

TÈÈLEJÀ DÎYÌ DYÈNDÈ



Twasàkidila, Mwanèètù Neville. Ngèèla meeji nè bààkamba kùdì Davidì nè: “Mvwa nè disàнка pààkangambilàbò nè: tùye mu nzùbu wa Mukalenge.” Kùdì ànu cintu kampàndà bwà kàlaasà kàà Dyàlumingu cidi bitùpà bikwàbò byà disangisha kabiyi naaci to, dībà dikwàbò dyònsò dyà mu ditùkù. Patùcidi tubiikilakù ku diikisha dīmpè dyà bufùku, nè— nè tudi tudyùmvwakù ànu bashiilàngàne, nè udi nè cyashima nè mudilongòlòle bwà ditùkù.

² Mpindyewu tudi tuumvwa nè... Makèèlèlè dilòlò awu, tuvwa bakonkè ba—bantu ní bàvwa nè èkèleeziyà wabò... uvwabò bàyamù awu, beenyi anyi—anyi... ndi muswè kwamba nè, bidimba byà ciibidilu byà maèkèleeziyà, bwà nè bàvwa nè cyà kuya mu èkèleeziyà wabò sungasunga mu dindà emu. Bwalu, twètù bu mutùdì bantu bàdì kabàyi bàsungulujangana bilondèshile màngumba to, katwèna ànu baswè kuumusha bantu mu disangisha dyàbò bóbò to.

³ Nènku ntu mubandiibwe misangu yàbùngì bwà—bwà dipiisha maèkèleeziyà. Aci's ncyà mafi. Ncitu mpiisha maèkèleeziyà makwàbò to. Ntu mpiisha, misangu yàbùngì, bintu bidìbò—bidìbò bàlekelela byènzeka abi, kàdì ncyà bushùwà nè ncitu mpiisha èkèleeziyà to. Kàdì, misangu yàbùngì, pàdìbò bàlongesha bintu bidì bibèngangana nè Mifundu, dībà adi ndi— ndi mpiisha aci. Nè pashiishe pàdìbò bènza bintu bidì bibi, nè— nè bàanyisha bwà kwenjiibwabì mu èkèleeziyà yàbò, ndi mpiisha aci's. Kàdì kacya... Ànu mùdìbì byambiibwe... Ndi nè balundà bààbùngì beena Kàtòlikè basòmbe kaaba aka, kàdì kacya ncitukù mpiisha beena Kàtòlikè to. Ndi mpiisha dilongesha dyà èkèleeziyà wa Kàtòlikè, bwalu ncyèna ngiitabuuya nè ndyà mu Mifundu to. Kàdì ncyèna ntàmba kubàpiisha kutàmba mùndì mpiisha àbùngì à ku màngumba à beena Mishòonyi to, bwalu ncyèna ngèèla meeji nè bidi bilondèshile Mifundu to. Nènku ndi mwenzèjiibwe bwà kutwà cidi Bulelèlè nyama ku mikòlò. Nwamònu anyi? Nudi bamanyè's, Nzambi neàkwanyishè bu wèwè mwà kwikala wa kweyemena, ànu nè meeji matòòke.

⁴ Nudi bamanyè's, misangu yàbùngì, muntu udi wenda ukèbanganà nè mukàji wa kusela, muntu mulùme mulelèlè mwikàle nè buntu bulùme mu yèyè, yèyè kèna ukèba ànu menemene mwànà wa bakàji udi mulenga bikolè—bikolè kwisù awu, anyi bikwàbò to. Yèyè mmumanyè nè abi nebijiminè, dimwè dyà ku matùkù àdì panshi aa. Nwamònu anyi? Yèyè ùdì ukèba mukàji udi mukàji mu buumùntù, mukàji mulelèlè. Nènku piikalàye nè lulamatu, nè mukàji mulelèlè, mulùme awu neàmwanyishè. Nànsha yèyè mwikàle mu—muntu mubi wa bishi, nè nànsha yèyè wènda ùnyunguluka mùshindù kaayi nè—nè

bakàjì babi; kakwènakù muntu mulùme mubì pa buloba apa udi kàyi mwà kwanyisha mukàjì udi mwà kushààla menemene cidi mukàjì nè cyà kwikala aci to. Ncyà bushùwà. Bwalu, yêyè ùdi wànyisha cyòci aci.

⁵ Nènkù ke mùshindù awu wùdibi ku—ku diyiisha dyà Dîyì, bu muntu mwà kukwàta ànu ku cidiye witabuuja aci. Mpindyewu kwèna. . . Wavùluka nè, Nzambì mmumanyè mwoyi wèbè. Nènkù bu wèwè mwà kukwàta ku cyùdi witabuuja menemene nè m'Bulelèlè aci, díbà adi udi mwà kwikala nè diitabuuja mu cyùdi wakula aci.

⁶ Ndi nè ndambù wa balundà bimpè mwab'ewu. Mwanèètù wa balùme Charlie Cox, ûndi mmòna musòmbe kuntwaku. Nè ndambù wa mbingu mishààle eyi, mvwa muyè nendè mu Kentucky, mu kulemba kwà nshindi, kùmvwà mupete ndambù wa diikisha. Mwanèètù Banks Wood. Nènkù, mpindyewu, twètù, patùdi tudìibidija nè bingoma byètù, bôbò. . . Bìdi bìnkèngela bwà cyànyì ciikale ànu cipwàngàne menemene mu mùshindù wà cifwànyine kufikisha dízajì ku cintu mu ntàntà wa metèlè makùmi ànaayi nè àsambòmbò, cyanaàna ncyèna ànu mwà kulemba to. Nwamònu anyi? Kwàjiki.

⁷ Èè, bìdi nè dikwàcisha kaayi bwà kwasa dízajì ànu pa katòba menemene? Nwamònu anyi? Bwalu, wèwè wasa nshindi, washila ku mutù, nè mutù wèndè mwikàle pàmwàpa bunène *ebu* eku nè eku, mwaba kanà wònsò munda mwà nyùngulwilu wa centimètres yibìdi anyi yisàtù nebiikale ànu bimpè, nwamònu's, mwaba kanà wònsò muntwamu. Yònsò wa ku bàna bàà balùme abu neàmbè nè: “Abi's mbimpè. Ndi mwasè nshindi.” Bàdi bàya nè bààngata nshindi awu. Kàdi, bwànyì mèmè, bìkèngela ciikale ànu cipwàngàne. Bìkèngela cilengè cintu ciludikila aci. Kacyèna mwà kucipangila mu cyàbinaayi cimwè cyà cyàlà to. Cidi nè cyà kulenga cintu ciludikila aci ànu munkàcinkaci, cyanaàna ndi ànu mbìnduluka nè nsaluka.

⁸ Nènkù mvwa musòmbe panshì, ditùkù adi, mu diitu, nè mvwa munkaci mwà kwamba nè: “Mukalenge, bwà cinyi—bwà cinyi ndi muntu wa cimfiikààmùndà wa mùshindù ewu? Bwà cinyi Uvwa mungenzè muntu wa cimfiikààmùndà wa mùshindù ewu?” Mèmè nè: “Mpindyewu kùdi. . .”

⁹ Mwanèètù Banks kuyayè kalemba nè cingoma cyèndè aci, kàdi kucibàndishila kuulu bwà kujoojilamù nè kwasa, nè tulòndò twà dimwènamù atu. Nènkù udi ànu. . . Ku musangu nè ku musangu, udi mufwànyine. . . dimwè nedipèmbukè, bwalu bu cyòci. . . Cyàpù cidi cyènza màzajì necyenzè nànkù, mu mishindù yònsò, bwalu mùdi mwà kwikala kapyà kàà cingoma katàmbidile ndambù, anyi kapyà kàà cingoma kashààdile ndambù. Kàdi cívwa ànu mwà kupèmbuka kakesè, anyi mu cyàlà cimwè anyi bibidì, Mwanèètù Banks ùdi wàmba nè: “Kaa, abi's mbimpè, mèmè's ndi mwasè nshindi awu. Abi's

mbîmpè.” Kabyèna—kabyèna bîmutàcisha to. Charlie pèndè, ànu mùshindù wùmwèwùmwè awu. Kàdi mèmè. . .

¹⁰ Dyànyì dìzajì dìdì nè cyà kutuuta cintu ciludikila aci, ànu munkaci menemene, cyanààna bidi bimbîndulula. Mèmè nè: “Nkaadi mulwè muntu wa cimfiikàmùndà ànu wetù wa ciibidilu ewu.” Nènku dîbà adi mèmè kubanga kutàngila paanyimà, kàdi kusangana nè nsòmbelu wanyì ùdì ànu mùshindù awu. Ké mwànyì mùndì mwenjiibwe. Ké mèmè kudyàmbidila nè: “Èè, Udi mungenzè mùshindù awu bwà cinyì?” Bìtu mene bîmvwija mubîndùlùke cyôci—cyôci cipèmbùke ànu kakesè ndambù *eku* anyì *eku*. Nènku’s ké mùshindù awu dîbà adi ùdì Mukalenge mucimbuulwile, mèmè musòmbé kuntwaku, mu Glutton Hollow, kwònsò kutùvwà tusanganyibwa aku, munkaci mwà kulemba nyama. Aci, ngèlè meeji nè bàdi bàcibiikila nè Dutton; kàdi, nshîndi yitù yidyà lùkàsàlùkàsà, ntu ncibiikila nè: “Mudyàvi.” Pa nànkù yitù. . .

¹¹ Lwà kuulu mu mwab’ewu, mèmè kudyàmbidila nè: “Ké cyôci aci’s.” Ncyìvwakù mene mwà kulongeshakù nè ifernò kampàndà ùvwakù to ànu pângàkatwishiibwa bwèndè. Nwamònu anyì? Nènku kî bwà cinyì Mufùndù wòwò wùdyànjila kwamba bwà dyondopa dyà kùdì Nzambi, nè *apa*, bîmwèka mùshindù *kampàndà* nè mùshindù *kansanga*; piikalà Mufùndù wàmba nè: “Taatu, Mwàna, nè Nyumà Mwîmpè,” byenze bu kùdì Nzambi yisàtù, nè *Mwômò amu* mèmè ndi mmòna nè kùdì ànu Umwèpelè; nènku mpindyewu mmunyì mûngiikalà ànu mwà kwenza nànkù ku mpùùkàpùùkà, bwà muntu kampàndà mukwàbò, cidiye wàmba pa Cyôci aci, kucyàngata mùshindù awu’s? Piikalà Bible wàkula bwà didyànjila-kulongolola nè ngàsà, kàdi *apa* ciikàlè nè byenzedi, nè *apa* ciikàlè nè ngàsà. Nènku ncyèna—ncyèna ànu mwà kuciyiisha mùshindù awu to.

¹² Ndi nè cyà kukosa bwalu bwàci, nè eku nè eku, eku nè eku, nè mu Bible mujimà, too nè mùdici menemene cìlenga cintu ciludikila, nwamònu’s, too nè mùdici cyà bushùwà cipàtukila ànu bipwàngàne mu Mifùndù mwònsò. Dîbà adi pàndì ngiìmana, ndi cyà bushùwà mwà kwikala nè diitabuuja mu cîndi munkaci mwà kwenza aci, nwamònu’s, kumanya nè cyùdì uyiisha aci m’Bulelèlè. Nwamònu anyì? Nè pashiishe muntu kampàndà yèyè mubèngàngàne naaCì, ukàadi mumanè kulonga bikùmbàne too nè mùdì umanya ànu menemene cidiYe wàmba, mwaba wà kumwimanyikila, nwamònu’s, ànu *Apa* mene. Nwamònu anyì? Nènku’s ké mùshindù awu wùdibi. Nzambi mmutwènze mishindù mishiilèshiilàngàne, bwà twamòna ànu cyanààna mwà. . . Aci ké cidi cyèenza nè buloba bwikalè mùshindù awu. Kàdi, aci’s ké citù cimvwija muntu wa mubiindùlùke, wà musakùlùke. Cidi nè cyà kwikala ànu cyôci.

¹³ Nènku ndi nè disànkà dyàbùngì, dilòlò edi, leelù ewu, mu dîndà emu—emu, bwà kwamba nè ndi mumanyè nè Mukalenge Yesù kî mmufwè to. Yèyè ùdì nè mwoyi, nè Yèyè ùdì ànu kaaba

aka mene mpindyewu ànu mwàkadiYe musangu kanà wònsò pa buloba mu Ngálèlè anyi mwaba mukwàbò kanà wònsò. Yèyè m’Mwànà wa Nzambì udi nè mwoyi, mubiishibwe ku lufù, udi myaba yònsò, mwikale nè mwoyi. Aci cìdì . . . Nè bu mèmè nciyi mufwànyine . . .

¹⁴ Bu mèmè mwà kulongesha Mufùndu wà Nzambì kampàndà wa maalu-malonda, nè nciyi mutwìshìibwe nè Yèyè ùvwa mwab’ewu mene, nùnkù’s ndi—ndi mupete cibwejàkàjì cyà menemene. Nciwànyine kumfikisha ku dibinduluka bikolè, mu mùshindù wà nciyì mwà kumanya cìmvwà ngèza to. Nwamònu anyi? Nènku ncìvwa mufwànyine kumanya mwaba wà kwambila bantu nè: “Èè, mpindyewu, Yèyè neénzè *cikampàndà*, anyi Neénzè *cikansanga to*.” Ncìvwa—ncìvwa mwà kunwàmbila to. Ncyèna mumanyè to. Kàdi paùdì mumanyè cyàkalayàYe nè Yèyè neénzè, nè muMumòne ùcyèza, díbà adi udi umanya mwaba wùdì mwimànyine. Nwamònu anyi? Nènku mònaayi mùvwà Nzambì, mu ndongamu Yèndè minène, mumanyè ànu mwà kwenza nè muntu yònsò ikale ànu menemene cintu kampàndà, bwalu Yèyè neàkwatè nendè mudimu bwà kiipàcìlà aku.

¹⁵ Nudi nuumvwa inàbànzà mutekète awu mwab’ewu, kùkaadi katanci anyi? Mandamu Stricker, wimba misambu kàyì nànsha nè mijikì to. Ùvwa nè cintu kampàndà cikesè cyà mùshindù kampàndà cìvwàye ùpwìdijilamù mupùùyà, bwà kucipèèsha cyonà, notè wendè—wendè anyi cyònsò cinùdì nucibiikila aci. Kàdi ùdì wimana nè wimba nè díyì dyà panshì menemene adi, nè kudibàndisha, nè: *Wèwè Mázuwà!* Mpindyewu, bìvwa bìkèngela bwà nwènù kungumvwa nteeta aci musangu mukwàbò. S’mbifwànyine kwikala byà byenza nè bwòwà’s. Kàdi, nudi numòna’s, Nzambì ùvwa mumanyè ànu menemene mwà kwenza mukàjì awu bwà wàkùmbana mwà kwenza nànkù.

¹⁶ Kàdi’s ke mùshindù awu. Tudi bònsò benza mùshindù mushiilàngàne. Bu twètù ànu mwà kupetakù kaaba kèètù mu Kilistò, nè kushààlamù nè kuMukwàcila mudimu.

¹⁷ Ndi mmòna mwànà mukesè wa bakàjì musòmbe kaaba aka, mu dindà emu, mu dikalù dyà balèmà. Mwoyi wèbè mukesè awu wùbèneshiibwè. Ncinyi cìdì cikucìbwile panshì, munanga wanyì? Dikòny dyà misunya-. . .dikòny-. . .Kaa, ncyèna mwà kwamba mwàkù awu to, pàndi ntwàdijà to; dikònyangala, anyi ní ncinyi. Ke cìdì bwalu ncyòci aci anyi, munanga wanyì, cìdì cikucìbwile panshì, anyi ntunèkè? Tunèkè. Udi mumanyè nè, Yesù ùtu òndopa bàna bàà bakàjì batekète, kì mmwòmò anyi? Wèwè ùdì mwànà mukesè wa bakàjì mulenga wa dikèma. Nènku ndi ngiitabuujà nè Yesù neàkusàngàjè.

¹⁸ Makèèlèlè dilòòlò awu, bàna bàà bakàjì batekète bàbìdì bàvwà basòmbe kaaba aka nè disaamà adi òvwà mene muntu nànsha umwe pa buloba apa kàyì mumanyè nè cìvwa ncinyi

to. Minu yàbò mikesè ayi milembèlèlè, nè makàsà àbò makesè kacya àlembelela. Bânà bàà bakàji batekète bàbidi balenga. Nènku kwenzekabi nè mmanyè mamwàbò nè kakwàbò mukàji. Ke mémè kudyùmvwa mulombòdìibwe bwà kupiisha démon uvwa mwà kuyumbakaja tukwàcikwètù tukesè tùvwà tusòmbè mwaba awu atu; ànu dyàkàmwè. Nènku bàvwa mu tùkalù twà balèmà ncyèna mumanyè nè kùkaavwa ntàntà bule kaayi to. Kàdi makèèlèlè dilòòlò awu, ke luumù kulwilalù, ku nshinga nè: “Bânà bàà bakàji abu mbiimànyine kuulu, bènda bànyùngùluka.” Nudi numòna aci, nè—nè Mukalenge Nzambi ùvwa mubenzèlè ngàsà mutàmbe búngi. Kaa, Yèyè’s mmwìmpè be bwètù twètù! Bìvwa bikèngela twètù kutàmbe kuMwanyisha.

¹⁹ Pashìishe mvwa ndyàmbedila, ànu makèèlèlè dilòòlò awu, paanyimà pàà mémè mumanè kwalukila kumbèlu nè mudyàdije panshi munda mwà tusunsa tukesè, Mwva ngèèla meeji ku nè: “Pàdi musùùkà wùpàtuka munda mwà muntu, cìdìku ncinyi?” Mmuntu wendè wa munda awu ngudi mupàtùke. Kì mmufwè to. Yèyè’s—yèyè’s ùcidi ànu nè mwoyi. Nwamònu anyi? Yèyè—yèyè ùdi nè mwoyi kashidi. Nènku bananga bèètù bàkaadi bayè dyàmwàmwà dyà cibwikilu eci abu, bàdi mu mubidi kampàndà—kampàndà wutùdi katùyi bamanyè nè ncinyi to. Kì ncibuulula to.

²⁰ Kùdi bitùpà bisàtù byà cintu cyònsò. Kùdi citùpà cyà mubidi wà cifwàkà, mubidi wà kawùyi wùfwa, nè pashìishe mubidi mutùmbishìibwe. Nwamònu anyi? Ànu mùdi bikwàbò bintu ebi, bu mùdi... Taatù, Mwànà, nè Nyumà Mwìmpè, bibwela mu kajila kàmwèpelè, nè bisàtù abi byènza Umwe. Dibingishìibwa, dijidiibwa, dibàtiiza dyà Nyumà Mwìmpè, mu kajila, bìdi byènza umwe awu. Pashìishe, nè musùùkà, mubidi, nè nyumà, byènza umwe. Nènku bìdi byènda mu bisàtù abi, kàdi bisàtù abi bìdi umwe. Kàdi angàtàbi cipese cyà—cyà lumwènu cyà ntengu yisàtù nè ùcitèèke pa muunya, necìleejè meekala, kàbìdi, meekala mwandamutekète nèashaale òmwèpelè.

²¹ Kàdi ùdi wangata dikùnze, nè utàngidila dikùnze mu dikùnze. Mbanganyì bàdi bamanyè diikala kaayi diikalàci? [Disangisha didi dyàmbe nè: “Ditòòke.”—Muf.] Ditòòke. Uh-huh. Kabyènakù bikèmesha anyi? Aci, cikùnze munda mwà cikùnze, cìdi cìmwèka citòòke. Bukùnze ncimanyinu cyà bupikudi. Nènku paùdi... Nzambi utàngidila mpèkaatù yètù mikùnze, mu Mashi makùnze à Mwàn’Èndè wa musinga mukolè awu, yidi mitòòke. Pa nànkù, kàdi, bikèngela Yèyè àtangidilè mu Mashi. Kabi yì nànkù to, yidi ànu mpèkaatù. Pa nànkù bikèngela twikalè mwínshì mwà Mashi.

²² Nènku pàdi musùùkà wùmuka mu mubidi, wùdi wùkwàta njila wùya mwaba wà diikisha, mu mubidi wùdi mu mmwènekèlu nè mbùngakeenu wa mubidi ewu, kàdi kì mmubidi wà mùshindù ewu to. Neùtwìlanganè nè bananga bèèbè. Kwèna mwà kubàlabula ku cyaanza to. Udi mwà kwakula naabò, udi mwà kubàtàngila. Bàdi bàmwèneka ànu mùdìbo mwab’ewu

emu. Bwalu, pàvwa Peetèlò, nè Yone, nè Yakòbò, bamònè Mòsà nè Eliyà, bàakabàjingulula, pa Mukùnà wà Dikùdimuka dyà mpàla. Kàdi's, mmubidi.

²³ Kàdi pashìishe pàdì mubidi awu, mwenze bu mubidi kampàndà wà mu dyulu, pàdìwu wùpingana pa buloba, wùdì wàmbula bintu bì—bìvwàwu musòmbèlemù musangu kampàndà awu, nè pashìishe wùdì wùlwa mubidi mutùmbishìibwe. Nè mubidi awu ke wòwù utwàmòna naawù Mukalenge Yesù, mu mubidi Wèndè mubiishìibwe ku lufù. “Citwikalà kî ncyànji kumwènèka to,” mwàkamba Pòlò, “kàdi tudi bamanyè nè netwikalè nè mubidi mufwànàngàne nè mubidi Wèndè Yèyè mwinè wà butùmbi awu, bwalu netùMumòne ànu mùdìYe amu.”

²⁴ Nè byanza byònsò byà kale byà minyèngù nè minyiinyi mitekètàngàne yònsò eyi nebijiminanganè mu bulenga bwà bunsongà. Nwènù balùme nè bakàji bakùlàkàji, nwavùlukaayi nè, nwènù . . . Eci ke . . . Aci, ke cimanyinu cyà cibùlà, bukùlàkàji bwènu abu. Kàdi mu dibìikà dyà ku lufù, kakwàkwikala cimanyinu nànsha cimwè cyà mpèkaatù to. Kàdi mbwà cinyi bùdì Nzambì munwenzè mùshindù wùdìYe mwenzè awu? Wàkakufikisha ku cikondo kampàndà, paùvwà nè bidimu bitwè ku makùmi àbidi nè bibidi, bidimu makùmi àbidi nè bisàtù apu, wèwè uvwa mu bwìmpè bwèbè butàmbe abu. Wèwè's uvwa udyà byàkudyà nè wenda upeta dikàndà, nè mubidi tumatuma, nè mùshindù ùvwà umwènèka muntu wa bukòlè mùvwà amu. Pashìishe, paanyimà pàà aci, udi ubanga kwela minyèngù, nwamònu's, lufù lùshikamamù. Kàdi, mu dibìikà dyà ku lufù, bukùlàkàji bwònsò nebùmushiibwè.

²⁵ Ndi ntàngila mwab'ewu muyiishi mukesè wa kale nè mukàjèndè. Bàdi mu bidimu byàbò makùmi mwandamukùlù, ngèèla meeji. Mwanèètù wa balùme nè Mwanèètù wa bakàji Kidd, bàvwa bàyiisha Èvànjeeliyò pàmwàpa kumpàlà kwà mèmè kulediibwa; kàdi nyèwù nkàadi muntu mununu. Nènku ndi mubàmòne basòmbe mwab'ewu, babàka bakesè bàà kale, bàà mmwènèkelu wa ditalala. Nènku ndi ànu ngèèla meeji, bwà, mu dibìika dyà ku lufù, mmwènèkelu wìkalabò nendè. Minyèngù yà kale ayi, nè byanza byà mùzakàla nè dizakala nè tunèkè, nè nsuki yà mvya ayi neyijiminè mu bulenga bwà bunsongà. Bidi bulelèlè bifuta bwà kusadila Mukalenge. Bidi nànkù bulelèlè. NetùMumòne, dìngà ditùkù.

²⁶ Ndi ndikonka Rosella Griffin ní ùdì kaaba aka. Mvwa njinga bwà kumufikisha ku dyambayè mwàkù kampàndà. Kanwàyì mukesè uvwa mwondòpiibwe ànu ku . . . mwab'ewu, kùkaadi ndambù wa bidimu. Nènku aci's ncifwànyine kwambulwisha kanwàyì kampàndà udi kaaba aka. [Mwanèètù wa bakàji kampàndà mu disangisha ùdì wàmbe nè: “Mwanèètù Branham, yèyè's ùvwà muyè kumbèlu mu dindà emu.”—Muf.] Bìvwa bikèngela bwà kwalukilayè kumbèlu mu dindà emu. Èyo. Bwalu bulenga be! Mvwa ngèèla meeji makèèlèlè dilòòlò awu nè bìvwà

bikèngela bwà mèmè kwikala mumwambile bwà kwambayè cintu kampàndà. Mvwa mufwànyine kucyénza, bu ngíkala mumanyè, nè ùvwa nè cyà kuya mu dindà emu. Bintu byàbùngì be bìndì ànu muswè bwà bantu bàà ku tabernacle kutèelejabo.

²⁷ Mpindyewu, kùdikù muntu kaaba aka bwà kubàtijiibwa, mu dindà emu, mu mâyì anyi? Tùmonèbi. Umwe, bàbìdì, bàsàtù, bànaayi, bàtaanu, bàsambòmbò, bu bàsambòmbò anyi mwandamutekète apa bwà kubàtijiibwa. Nè mudimu wà dibàtiiza newùlondè dileesònà dyà kàlaasà kàà Dyàlumingu edi.

²⁸ Mpindyewu, cibambalu cyà kàlaasà kàà Dyàlumingu bwà Mwanèètù wa bakàjì Arnold, bwà bàna bèndè bakesè abu, ncyumusha. Nènkù netwikalè ànu, bu wèwè mwà kuswà, Mwanèètù wa bakàjì Arnold, netwikale ànu nè cyà kwindija aci too nè ku ditùkù dyàlondà, bwalu katwèna nè cibambalu bwà kàlaasà to. Nènkù nembalè ndambù wa Mifundu kaaba aka mu tusunsa tukesè emu, bwà bàna bakesè, nènkù aci necibàpèèshe cintu kampàndà cyà bóbò kwelapù meeji, bóbò pààbò. Nè pashìishe mu dyàlumingu dilwalwà edi nenùtungunukè nè masangisha ènù à ciibidilu nè kàlaasà kàà Dyàlumingu. Mpindyewu, tudi baswè kwamba . . .

²⁹ Cìkwàbò cintu cìndi muswè kwamba mu dindà emu ncyòci eci. Mvwa—mvwa—mvwa mubàmbile bwà kabàcyénjì to, kàdi bóbò mbacyenzè, nànsha bìshi. Nwamònu anyi? Aci's cìvwa, mmulàmbù makèèlèlè dilòòlò wùvwa mulwè kùndì, nwamònu's, mulàmbù kampàndà. Mèmè kubàmbila bwà kabàcyénjì to, nwamònu's. Nènkù bàvwa . . . Kàdi mbacyénzè, nànsha bìshi. Nènkù pàvwà . . . Ncìvwa mucìmanyè to too nè pààngambìdì Billy nè mwanèètù wa balùme Doc ùvwa mumutwàdilawù, ku nzùbu kwèndè aku. Kàdi mèmè ncìvwa mwanjì kuwùbadika to, kàdi ndi ngèèla meeji nè mbalondè nè kùvwa bu nkàmà yisàtù, anyi ndambù mukesè pamutù pàà nkàmà yisàtù. Aci cìdi . . . Udi muvùlùke, Doc, nè cìvwa ncinyi anyi? [Mwanèètù Edgar Branham ùdi wàmba nè: "...makùmi àbìdì nè ìnaayi, dikùmi nè ìbìdì."—Muf.] Cìvwa ncinyi aci, mwanèètù? ["Nkàmà yisàtù, makùmi àbìdì nè ìnaayi, dikùmi nè ìbìdì."] Nkàmà yisàtù nè makùmi àbìdì nè yinaayi, dikùmi nè yìbìdì. Ndi nnwèla twasàkidila, wa manza tètè.

³⁰ Mpindyewu, ndi mupàtùke mu mudimu ntàntà mule. Aci nudi bamanyè. Nènkù bu mùdì mufùndì wanyì mwikàlapù, anyi bàmwè bàà kùdìbo mwab'ewu mu dindà emu, mbamanyè nè mfrangà yìntù ntùùla, nànsha mèmè nsanganyiiibwa penyi, ànu mwab'ewu kumbèlu, bìdì bìngangata ndola mipìte ku lukàmà ku ditùkù, byà bìrò byànyì nè bikwàbò bwà kutùma mishwàlà nè bikwàbò mu buloba bujìmà, mu ditùùlù dyà mfrangà.

³¹ Nènkù ndi—ndi muswè kwamba nùnkù ewu, dinùkànkamika nwènù aba, nànsha nànkù. Bwà bùngì bwà bantu, aci's mmulàmbù mutàmbe bunène wùmwàkù kacya mupete kacya

bàndela. Nudikù nujingulula nè aci ncifwànyine kwikala bu ndola umwe ku muntu, ku yôyi myabanyina ku búngi bwà bantu anyi? Nè yàbúngi yà ku milàmbù yà mu mudimu yôyi myabanyina ku búngi bwà bantu yitu bu, bu meeyà makùmi àbìdì nè àbìdì anyi makùmi àbìdì nè àtaanu ku muntu. Kàdi ewu ùvwa bu ndola umwe ku muntu. Bwalu, ndi mumanyè nè kanwèna mwà kubwela mund'emu. . . Kabèèna bàngata milàmbù pambèlu apu to. Nènku kanwèna mwà kupàcika mu mwaba mukèsè ewu, kupicisha bantu bu nkàmà yisàtù to, ndi—ndi ngèèla mpatà. Udi mumanyè búngi bùdì nkwasà yà mu tabernacle anyi, Mwanèètù Neville? [Mwanèètù Neville ùdi wàmba nè: “Bìvwa bikèngela kwikalayi búngi kampàndà bwipacila ku nkàmà yisàtù, mùshindù wùdìbi mpindyewu ewu.”—Muf.] Bantu batwè ku nkàmà yisàtù. Pa nànkù, nwamònu's, abi's mbiipacila ku—ku ndola umwè ku muntu. Nzambi mmumanyè mùndì ngàanyisha aci. Ndi nnwèla twasàkidila wa manza tètè. Nènku cidi cìbwela buludì mu mudimu wà Mukalenge. Ndi—ndi nnwèla twasàkidila bwà bwalu abu. Nè bwà. . . Bu byòbì mwà kwenzeka nè bàmwè bàà kùdìbo bìikalè bùùmukè kumpàlà kwà dilòòlò, bwalu. . . nè mèmè. . .

³² Pàndi mwalùkile kumbèlu makèèlèlè dilòòlò awu, mu lutanda amu mùvwa musòmbe kashèètè kakesè, nùnkù ewu, nè cìvwa mmusùmbà wa—wa komfitilè, Ndi ngèèla meeji nè, aci ncifùmine kùdì muntu kampàndà. Nudi bamanyè's, mèmè ntu ànu munangè komfitilè. Nènku ndi—ndi ngàanyisha aci. Nènku mwanèètù wa—wa bakàji kampàndà mwab'ewu, mbitàmbe bwìmpè ncitèèdì dìnà dyèndè to. Mmulundà wa katàpùlà-katèèka wa dìkù dyètù, nè mmushiyè dipà dyà dinanga kwà mààmù, bwànyì mèmè nè bwà Billy. Kwèna mumanyè to, mwanèètù wa bakàji, mùshindù wùndì ngàanyisha aci, nè ncikondo ciinè cìdici cilwè's.

³³ Nènku, kaa, bintu byàbúngi be! Nudi nuumvwa's. Nènku ndi mutwìshìbwe nè Yèyè ùdi ùmvwa. Nènku ndi ànu mutwìshìbwe nè Yèyè neàbeneshè yònsò wa kunùdì, byàbúngi byà bìyiila nè panshì. Mvwa kujinga bwà ngìkalakù mwà kwalukila kumbèlu nè yònsò wa kunùdì, nè—nè kushààlaku neenù katanci kakesè, nè kuyiikila neenù. Ntu munangè kwenza nànkù.

³⁴ Kàdi, cidi, s'nudi bamanyè mùdìbi, ànu mu lwendu dìbà dyònsò. Bikèngela ànu tuye nè lùkàsà lwònsò. Bwà kwamba menemene, ànu paanyimà pàà disangisha dilòòlò edi, bu Mukalenge mwà kwanyisha, nènshiyè ditùnga, ànu pàdì disangisha dijika nè dyàjikiè. Bikèngela mpatukè mwab'ewu kumpàlà kwà dìbà dikùmi nè ibìdì jaajaaja. Ndi nè cipungidi pa dìbà dikùmi nè ibìdì jaajaaja. Kàdi ndi naabì tètè, mu mapingaja emu. Nè ndi. . . Nudi bamanyè mùdìbi's. Dìbà dyònsò bìdì ànu ku mwaba nè ku mwaba, dìbà dyònsò; bantu bàsaama, bàpùnga nè lufù.

³⁵ Nènku misangu yàbúngi yíntù mbwela mu mwaba

kampàndà, nè ngiìmana ànu mwaba awu, nè muntu kampàndà ùbwela, wàmba nè: “Udi mummanyè anyi, Mwanèètù Branham?”

“To, ncyèna mumanyè to.”

³⁶ “Mòna’s, mvwa mulààle mu lùpitaadi, mpùnga nè lufù, pawàkalwà kunsambidila. Mukalenge mmungondòpe.” “Mvwa mpofo pawàkatwilanganà naanyi mu mùsèèsù, ditùkù adi cìkèèna-kumòna kulwaci.” Nwamònu anyi? Nè ncìtukù—ncìtukù mumanyè nè ncinyi to.

³⁷ Kàdi ndi ngèèla meeji ku dyeji dibènèshùbwe edi, Mwanèètù Egan, dyà nè, dīngà ditùkù pangìikala muyiishè diyiisha dyànyì dyà ndekeelu, musambidile muntu wa ndekeelu udi Mukalenge muswè bwà mèmè kusambidila awu, nènku ndi ngààlukila Kumbèlu! Nènku mu dīndà dyà dibìikà dyà ku lufù adi, kaa, nditùkù kaayi diikalàci’s, disànkà adi’s wè! Pāndi mwà kwimana Mwaba awu, pàajuukà mukalenge-mukàji wa ku Sud, ndi mwà kumòna bwenzeji bwàkapetaye! Nèmmòne Billy Graham, ùbanda kuntwaku nè bwenzeji bwàkadiye naabù abu. Oral Roberts, nè bakwàbò bònsò abu, ba Sankey, Finney, Moody, Calvin, Knox, nè bakwàbò. Pashiishe nèmmònè cisumbù cyànyì cìbànda. Kaa, aci’s necìikalè disànkà, necìikalè dyashiibwa dyànyì dyà cifulu cyà butumbi. Ncyà bushùwà. Nènku, ku ngàsà wa Nzambi, ndi ntèkemena nè nengìikalè nè mìlìyò yàbùngi Muntwamu.

³⁸ Kàdi mpindyewu bìdi bikèngela bwà nye dyàmwàmwà dyà mbù ànu àbìdi àdi panshì aa. Nènku mpindyewu, bwà ku dyànyì dimanya, ànu mu masangisha ètù sungasunga, anji elàayibi ànu meeji pa bwalu abu, mèmè ndi mu mùlìyò wànyì mwibìdì wà misùukà, mpetela Kilistò. Nènku ndi—ndi ntèkemena nè ndi mmòna mìlìyò yàbùngi, yàbùngi menemene yìpeciibwa.

³⁹ Mpindyewu, mudimu wà dibàtiiza, nè mpindyewu bi—bipungidi nè bikwàbò. Nènku, mpindyewu, eci citu ku musangu nè ku musangu paanyimà pàa disangisha.

⁴⁰ Dìbà kanà dyònsò dyùdì walukila bwà muyiikì wà bàbìdi wà pàa nkààyeebè, anyi bikwàbò, ubiikila ànu muntu udi mwab’ewu, Mwanèètù Mercier. Bidi bikèngela bwà twètù kwikala nè ndongolwelu wa mùshindù kampàndà, utùdì nè cyà kwikala nendè. Aci’s tudi bamanyè. Nè Mwanèètù Mercier, ùdi ùyifunda, ùdi ùyifunda ànu mùlwalwàbo amu, nènku pāndi ànu njikija bipungidi, bìjika byònsò, ndi . . . Pāndi ndwa, ndi mmubiikila mmwambila nè: “Ndi mujikijàngàne nè musumbà awu.” Yèyè ùdi ùmpèèsha musumbà mupyamùpyà, nènku ke mèmè uyààya cyàkàbìdì ewu, nudi numòna’s. Pashiishe, byònsò bìdi byènzekela ku bìrò abi. Nè yèyè mmumanyè ànu mwà kubàtèèka mu mùshindù wà nè yèyè ùdi mwà kubweja muntu nè muntu, udi mwà kubwelamù awu, nudi numòna’s. Pa nānku, tudi nè disànkà dyàbùngi dyà

kwikalakù nè bìrò bikesè ebi bikwàta mudimu mùshindù wùdibi byènza ewu. Pa nàнку aci cidi ànu BUTler 2-1519. [Nomba wa tèlèfonè mmushintùlùdibwe.—Muf.] Nènku aci's... Anyi, nwènù babìikile Jeffersonville, nùmbìikila ànu mèmè, nènku nebàndamunè ku bìrò aku. Nènku twasàkidilaayi, wa manza tèntè.

⁴¹ Mpindyewu twanjààybì, kumpàlà kwà twètù kubuulula Díyì Dyèndè dibènèshìibwe... Nènku vùlukaàyi nè, dyàkàmwè paanyimà pàà disangisha edi dimanè kujika, nè mudimu wà dibàtiiza, Billy neikale mwab'ewu bwà kwabanya twartà twà disambila bwà dilòòlò edi.

⁴² Mpindyewu, bu mùdibi nè dilòòlò edi ndilòòlò dyà èkèleeziyà, dyàlumingu dilòòlò, bantu bààbùngì bàà mu cimenga emu nebiikalè mu èkèleeziyà yàbò sungasunga, nè mu nyùngulukilu wa Louisville nè mu nyùngulukilu mwònsò. Nebiikalè mu èkèleeziyà yàbò sungasunga. Kàdi nekwikalè ànu nanganangà bantu bàà pambèlu. Ki bwà cinyi, ndi ngèèla meeji nè pàmwàpa tudi mwà kwelesha mulongo munènè wà babèèdi dilòòlò edi nè kusambidila muntu nè muntu wa kùdìbo. Ndi nè dyeyemena nè netùcyènzè. Tudi nè ndambù muvùùmvùke wa twartà twà disambila tutùdi baabànye.

⁴³ Ndi—ndi ngèèla meeji nè, makèèlèlè dilòòlò, paanyimà pàà makèèlèlè dilòòlò, kaa, mvwa ànu mudyùmvwe bu nè mvwa nè cyà kwenza lùmwe lwà ku ngendu ayi yà ubùùka nkàyeèbè, kaa, nudi bamanyè's, yitùtù twamba ayi. Ànu bwà kumòna, mu kaatabernacle kakesè kàà kale aka, cyàkàbidì, byanza byela muulu.

⁴⁴ Ndi nè mwànà mukesè wa balùme kaaba aka, mmwànà wa balùme ànu menemene, Joseph mwànà. Ùdi ànu nè bidimu bitwè ku bisàtù cyanààna. Kàdi pàvwà bantu bònsò munkaci mwà kwela mbilà apu, s'mmutùpìke ànu mwab'awu kudyèla munkaci mwà kajila nè kwela byanza muulu, nè kubanga kwela mbilà nè kutùmbisha Mukalenge, ànu munkaci mwà kajila mwàmwa's! Nènku ndi ngèèla meeji, mu dindà emu nè, mbabuundàngane yèyè nè mwanààbò wa bakàjì, ke kumusùmayè mènù ku dibòkò, ki mèmè kumwambila nè dyela dyèndè dyà mbilà adi kadivwa nè bwà nsongo to pàvwàye ànu wenza maalu mùshindù awu. Kaa, èkèlekèle! Bàna bakesè abu, mùshindù mwinè ùdi mwà kubànanga's, kî mmwòmò anyi? Èè, mu bushùwà bwà bwalu, civwaci ncyà nè, ùvwa mumòne ànu mùvwa bakwàbò abu bàcyènza ke kwelayè meeji nè ke civwà cikèngelà bwà yèyè kwenza, pèndè, nè pàmwàpa wènda ùtùlonda, mùshindù wutùvwà twenza awu.

⁴⁵ Mpindyewu tudi nè Díyì Dyèndè ditèèka kaaba aka dibuulula. Mpindyewu twànjààyi kwakula Nèndè pa Dyòdi adi. Mpindyewu ànu...

⁴⁶ Nzambi munanga, patùdì tulwa Kùdì mpindyewu mene apa, nè kaneemu kònsò, nè ditalala dyònsò, nè didipwekesha dyònsò, nè mu diitabuuja, biikàle twitabuuja nè Wèwè udi umvwa nè newàndamunè ku disambila. Bwalu, tudi tulwa mu Dìna didi dikumbàne mu byònsò dyà Mwan'Èbè, Mukalenge Yesù, Udi kàyì mwà kupangila awu, nè mufile mulayi, nè: “Nwènu balòmbè Taatù cintu kanà cyònsò mu Dìna Dyànyì, Mèmè nèncyènzè.” Dìbà adi tudi tumanya nè netùpetè ànu citùdì tulòmba aci, bwalu tudi tulwa mu Dìna Dyèndè. Bwalu katwèna nè Dìna dikwàbò ditùdiku bafwànyine kuseemenamù Kùdì, Yèhowàh Nzambi munène, wa bukolè awu to. Nènkù tudi tulwa mu ngàsà Wendè, katùyì tutonda nè tudi tukumbanyina cintu nànsha cìmwè to, kàdi mbwalu Yèyè wàkatwènzela difuta dyà cibawu, mu kutùfwilà Kwèndè. Nè Wàkafuta cibawu bwà mpèkaatù yètù, nè tudi tuumvwa nè tudi mwà kwimana babingìshìbwe ku mèsù Kwèbè, ku lufù Lwèndè. Ke diitabuuja dyètù ndyòdì adi. Nè katùyì tulòmba cintu nànsha cìmwè cidi cìfwànyine kwikala cibi to, kàdi cidi cìfwànyine kwikala cìmpè bwà muntu nè muntu wa kutùdì.

⁴⁷ Ki bwà cinyì, Mukalenge Nzambi, akùlaku neetù ku Dìyì Dyèbè. Nènkù akùlaku neetù mu Dìyì adi, bwà twamònakù mwà kuumvwa nè kumanya menemene mwà kwikala balùme nè bakàjì, bàna bàà balùme nè bàà bakàjì batàmbe bwìmpè. Bamanye nè ciibi cinène ku lufù kwàka, nè, musangu wònsò wùdì mwoyi wètù wùtuuta, tudi ànu tutàmba kuseemena pabwìpì nè ciibi aci kutùyaaya bònsò kabwela. Nè dìbà adi bamanye, nè, paanyimà pàa twètù babwelemù, kakwèna mpùngà nànsha wumwe kàbìdì wa kwenza dipungijangana to. Kakwènakù kàbìdì mùshindù wutùdì mwà kwikala nè mpùngà wutùdì ànu nendè mpindyewu ewu to. Nè katùyì ànu bamanye nè ndìbà kaayi ditwàsambuka mulongo awu, Èyì Nzambi wa yààyà, lwàkù kutùdì lùkàsàlùkàsà nè tufikìshèkù ku byumvwilu bìvwà bikèngelà bwà twètù kwikala naabi, nè kumanya mwà kuseemena pabwìpì Neebè, nè bwà kutèndakeenakù bwà bwalu bwètù kumpàlà Kwèbè nè kulòmba luse. Enzàku nànkù, Mukalenge.

⁴⁸ Tudi cisàmbà cidi mu lukèngelu. Tudi mìkòòkò, munkaci mwà kubìikila Mulami wa mìkòòkò wìkala mwà kutùlombola mu mwoyi wètù, nè kupweka kupìcila mu cibandabanda cyà mundidimbì wà lufù. Bu mwàkamba Davidì, wa kale awu, nè: “Ncyàkucinakù to pàngààfikà pa kaaba aku,” bwalu Mulami wa mìkòòkò neàndombòlè buludi kupìcila mu mwaba awu, too nè mwìmanà makàsà ètù mashindàme pa Mwelelu wà màyi wà butùmbi awu, mwìkalà bukùlākājì nè mabèèdì nè tunyinganyinga nè lufù mwà kunyeema kutùdì, nè twètù netwìkalè badìshikàmìne, Mwàmwa, bwà kashidi.

⁴⁹ Akùlà, Mukalenge. Munanga mukesè wa twìsù tubàlakana wa muntu kampàndà ewu, udi musòmbè kaaba aka kumpàlà

kwànyì eku, mu dikalù dyà balèma edi; ncyèna ànu mwà kuumusha mèsù àànyì pa yèyè leelù ewu to; mucibwila yònsò panshì kùdì tunèkè, cìdì mubì ewu mumwenzèle. Éyì Nzambi, twàlakù disungidiibwa kùdì munanga mukesè awu. Enzàku nànkù, Mukalenge. Kí ng'ánu kùdì yèyè to, kàdì nè kùdì bakwàbò kaaba aka bàdì bindìle. Nyumà Mwimpè Webè àbàbàndishè kuulu menemene, mu dindà emu, bwà nè nebàpitè dizakala dyònsò dyà mpatà nè cipùmbishi cyònsò cyà mpèkaatù, bwà Nyumà Mwimpè Webè wàmòna mwà kukwàta mudimu pambidi pààbò nè kubòndopa. Enzàku bintu ebi, Mukalenge. Bwalu tudi tulòmba mabènesha aa bwà butùmbì Bwèbè, mu Dìna dyà Mwànà, Yesù Kilistò. Amen.

⁵⁰ Mpindyewu, ndi musungùle bu cyena-bwalu mu dindà emu... Nènkù nwènù bàna bakesè nùmfwilaayikù luse, bwà kupicisha dībà dyònsò nè bakùlumpè, nè kàlaasà kèènú kakèènakù mwab'ewu to, bwà mu dindà emu. Kàdì ndi muswè bwà nwènù kutèeleja, nwènù pèènú, cìdì muswè kubala aci. Nènkù ndi muswè kubala, mu dindà emu, mu Samwèlè wa Kumpàlà, nshapitá mwi3.

⁵¹ Nènkù ndi muswè kwangata bu cyena-bwalu nè: *Tèèlejà Dìyì Dyèndè*. Cìikala mwà kukùmbana bwà bàna bàà bakàjì batekète nè bàà bakàjì bakolè, nè bàna bàà balùme batekète nè bàà balùme bakolè, bònsò. Vùlùkaayi cyena-bwalu aci nè: *Tèèlejà Dìyì Dyèndè*.

⁵² Mpindyewu, nwènù bàdì munkaci mwà kubuulula mu Mifundu abu, kùdì Samwèlè wa Kumpàlà, nshapitá mwi3, mùshindù ewu ke mùdici cibadiibwa bwà mvensà dikùmi yà kumpàlà ayi.

Nènkù mwànà awu Samwèlè úwà úkwàcila
 MUKALENGÉ mudimu kumpàlà kwà Elì. Nè dīyì dyà
 MUKALENGÉ ñwà dyà mpùùkàpùùkà matùkù awu;
 kakùwà cikèèná-kumòna cyà patòòke to.

⁵³ Kaa, mùshindù mwinè wùndiku mufwànyìne kujinga kunèèngakù mwab'awu bwà katanci kakesè, pàmwàpa musangu kampàndà mukwàbò. Cìdì ànu cìdèngà's. Ndekèlaayi ncibalè ànu cyàkàbìdì musangu wùmwe, mvensà awu.

Nènkù mwànà awu Samwèlè úwà úkwàcila
 MUKALENGÉ mudimu kumpàlà kwà Elì. Nè dīyì dyà
 MUKALENGÉ ñwà dyà ku mpùùkàpùùkà mu matùkù
 awu; bwalu kakùwà cikèèná-kumòna cyà patòòke to.

⁵⁴ Nudi numòna cìdì cikèèná-kumòna nè ncinyì anyì, dībà adi? N'Dìyì dyà buludi dyà Mukalenge. Nwamònu anyì? Nè Dìyì dyà Mukalenge ñwà dyà ku mpùùkàpùùkà.

Nènkù byàkenzeka mu cikondo aci, pàwà Elì
 mudyòlòle panshì pa kaaba kèndè, nè mèsù èndè
 mabange kubwicidila, mu mùshindù wà kàciyì mwà
 kumòna to;

Nè kumpàlà kwà mwëndù wà Nzambi kujimawù mu ntempèlu wa MUKALENGE, mùvwà mushèètè wà cipungidi wà Nzambi wùsanganyibwa, nè Samwèlè mulàadile panshì muye mu tulù;

Nè MUKALENGE wàkabùikila Samwèlè, nè yèyè kwandamuna nè: M'mémè ewu.

Ke kuyayè lubilu kùdì Eli, nè kwamba nè: M'mémè ewu; bwalu wèwè udi mumbùikile. Ke yèyè nè: Ncyèna mukubùikile to; nda ukalààle panshì cyàkàbìdì. Ke kuyayè nè kudyòlola panshì.

Nènku ke MUKAL- . . . Nènku ke MUKALENGE kubùikilayè cyàkàbìdì Samwèlè. Ke Samwèlè kubùika nè kuya kùdì Eli, nè kwamba nè: M'mémè ewu. . . M'mémè ewu; bwalu udi mumbùikile. Ke kwandamunayè nè: Ncyèna mukubùikile to, mwanàányi; nda ukalààle panshì.

Mpindyewu Samwèlè kàvwa mwànji kumanya MUKALENGE to, anyi dīyī dya MUKALENGE kadivwa dyanji kumubuulwila to.

Ke MUKALENGE kubùikilayè cyàkàbìdì Samwèlè bwà musangu mwisâtù. Ke kubùikayè nè kuyayè kùdì Eli, nè kwamba nè: M'mémè ewu; bwalu udi mumbùikile. Nènku Eli kujingulula nè MUKALENGE nguvwa mubùikile mwànà awu.

Ki bwà cinyi Eli kwambila Samwèlè nè: Nda, ukalààle panshì: nènku nebùikalè nè, yèyè mukubùikile, nè wèwè newàmbè nè: Akulà, MUKALENGE; bwalu musadidi webè ùdì ùtèèleja. Pa nànkù Samwèlè kuyayè nè kudyàdijayè pa kaaba kèndè.

Ke MUKALENGE kulwa, nè kwimana, nè kubùikila bu misangu mikwàbò ayi, Samwèlè, Samwèlè. Ke Samwèlè kwandamuna nè: Akulà; bwalu musadidi webè ùdì ùtèèleja.

⁵⁵ Dīyī dya Nzambi! Kutèèleja Dīyī Dyèndè mu ditùkù adi cīvwa cintu cyà ku mpùùkàpùùkà. Nwamònu's, kakùvwa cikèèna-kumòna cyà patòòke to. Kàdi cīvwa ncintu cyà mpùùkàpùùkà, Dīyī dilelèlè dya Nzambi, bwalu bantu bàkaavwa bayè kule. Bàvwa nè èkéleeziyà, mu ditùkù adi, uvwa kàyì ànu ùlonda mèyì matùma à Mukalenge to. Bàvwa nè—nè mwambi kampàndà dīnà dyèndè Eli. Nènku yèyè ùkaavwa muyè kule nè Nzambi, mu kulongesha kwà tunungu ànu twà cīvwa bantu baswè kwitabuuja aci. Piikalà aci ní kī ncifwàràngàne nè ditùkù edi's! Wàkalongesha bantu ànu, nè yèyè—yèyè wàkenza disungula dyèndè, nènku ùvwa ùlekela bànà bèndè bàà balùme bàngata munyiinyi wà mutàmbe bwimpè kuntwaku, mutwa ku nsomò, mu—mu mulàmbù amu. Nènku kulwaci ànu mwaba kampàndà wùvwà mulàmbù mushààle cintu cyà mushinga. Nènku Samwèlè, kàyì nè ntèmà bwà

mùshindù wùvwàye ùtùmikila mèyì matùmà à Mukalenge. Nè Dìyì dilelèlè dyà Nzambi òvwa dyà mpùùkàpùùkà.

⁵⁶ Mùshindù awu ngùdìbi leelù ewu. Tuyààya mu èkèleeziyà nè tujandula nè bantu bàyaayamù nè biikàle nè kàmwe kabingilà kanène nè: “Tudi baswè kuvwija òngumba dyètù, cidimu eci, *ditámbe* bunène bikolè. Lwàkù nè mukàndà wèbè mukufùndila wà ku èkèleeziyà wèbè mukwàbò awu, bwà kudisanga neetù.” Nè bifidi byà nè: “Mùliyò mukwàbò mu cidimu cyà 44.” Nè byònsò byà mùshindù awu abi, bèèla mbilà, bàteeta bwà kudyunda kupita òngumba dikwàbò adi. Nè mu kwenza kwà nànkù awu, tudi bashiye biibi bwàshì, bwà Bible. Tudi bayè kule, nè babangè kulongesha bintu bishilèshilàngàne.

⁵⁷ Bapròfeta bààkaakula bwà matùkù aa, nè pàvwà: “Bòbò, bwà dilongesha, nèbàlongeshè dilongesha dyà muntu kàdi kaciyi Dilongesha dyà Nzambi to.”

⁵⁸ Nè tudi bamòne byàbùngì byà bwena abi, nè mbitùngùnùke nànkù ntàntà mule, mu mùshindù wà nè, leelù ewu, Dìyì dyà Mukalenge ncintu cyà mpùùkàpùùkà, bwà muntu mwà kulwa kwamba nè: “EMU MMÜDÌ MUKALENGE WÀMBA.” Mpindyewu, tudi bapete ditentula bùngì cyanààna dyà aci. Sàtaanà ùdi bushùwà mu mudimu. Nènku bidimu byàbùngì bishààle ebi, bantu bàvwa nè bwòwà bwà kwamba aci bu kaciyi cyà kùdi Mukalenge to. Kàdi, leelù ewu, kabèèna ànu bàbìcyùka to. Kàdi’s ncintu cyà ku mpùùkàpùùkà bwà kutèeleja Dìyì dyà Mukalenge, nè kupeta muntu udi mwà kwamba nè: “Mukalenge mmwakùle naanyi.” Nudi numòna aci munkaci mwà bantu, kàbìdì, mu mùshindù wà nè mbikolè bwà bòbò kuumvwa cikondo cìdìbo bàmba nè: “Mukalenge mmwakùle naanyi.”

⁵⁹ Pàvwàbi nè, balùme nè bakàjì bàvwa nè ciibidilu cyà kusambila bufùku bujimà, nè nzùbu yàbò mitèèka mu bulongàme, ku Mukàndà wà Mukalenge, nè Nzambi ùvwa nè mwaba wà kumpàla mu dìkù dyàbò.

⁶⁰ Nwamònu’s, tudi nè bintu bipite bùngì kumpàla kwà Mukalenge. Kwèna mwà kwenza disangisha dyà milòmbò to, bwalu Mukalenge Godfrey ùdi ku tudyòmbà dilòlò edi. Kanwèna mwà kwenza disangisha dyà milòmbò to, bwalu *Tudi Banangè Susie* ùdi ku tudyòmbà dilòlò edi. Anyi, bintu kampàndà byà lukutukutu byà mùshindù awu, bìdì byàngata dībà, nè katwèna nè dībà dyà kutèeleja Dìyì dyà Mukalenge to. Nènku aba bàdì bàlaka mukana bàmba mùdìbo beena Kilistò abu, bàdì ànu bàtwa binù panshi, bwà disambila dikesè bu edi nùnkù, dyenze bu dikwàtakajila mu nzùbu nè: “Mukalenge, mbènèshèku mèmè nè dìkù dyànyì, nè tükùbekù. Dilòlò dilenga.” Nènku pàcyacyàbo mu dindà, ùjuuka wàmba nè: “Tùlombòlèku ànu mu ditùkù dijimà emu. Ditùkù dilenga.”

61 Bivwa bikèngela bwà twètù kwikala bindile Mukalenge. Nudi numòna's, tutu twenza dyakula dyònsò. Katutu tuMupèesha mpùngà wa kutwàndamuna to. Bwà nè, bu twètù mwà kusambila, nè kusambila too nè pààbwelà musùùkà wètù mu Bwikadi bwà Nzambi, nè pashìishe kudilekelela ànu cyanààna nè kutèeleja Díyì Dyèndè.

62 Kàdi kùdi mèyì búngì cyanààna, leelù ewu, àdi uumusha Díyì dyà Mukalenge kutùdì. Kùdi díyì dyà bisànkasanka. Bantu bààbúngì bàdi munkaci mwà kutèeleja adi, mwaba wùdìbo mwà kuya bàpìcila mu cikondo cyà dicyònkómoka. Nè bààbúngì bàà kùdìbo bàdi bàmba mùdìbo beena Kilistò. Kùdi bidundadundà byà kale byà mùshindù kampàndà bìlwa, kabèena ànu mwà kutèeleja byà diciinà dyà Nzambi to. Bàdi bàmba nè: “Èè, mèmè's ndi mwena Kilistò, s'bivwa bikèngela bwà mèmè kubala mvensà kampàndà mu Bible leelù ewu. Eyowà's: 'Yesù wàkadila mwadi.'” Kwàjiki's. Bàkèba kwà kuya bàya. Kàdi pashìishe bwà bapweka bulelèlè panshì nè kusambila, bàdi nè bintu bikwàbò bipite búngì byà kwenza. Kùdi mèyì búngì cyanààna pa buloba, bintu búngì cyanààna bwà kukòka ntèmà yètù kuyùmusha kùdi Nzambi.

63 Nè makèèlèlè awu, patùvwà mèmè nè mukàjàànyì bayè ku makàjiinyì à byàkudyà, bwà kusùmba ndambù wa byàkudyà. Nè mvwa ndwijakaja bwalu mvwa mushààdile paanyimà nè bipungidi nè bikwàbò, nènku mvwa ngèza ne lukàsà lwònsò. Nè kùvwa mwànà wa balùme kampàndà muteketè mwimàne mwaba awu, ùbùnga nè tulù, nè kànà kàà bakàji kakesè kàà kale kulwilakù mwaba awu kalwàte kàpanù kakesè, kàvwà kàà muntu mulùme kampàndà. Bivwa nè cyà kwikala nànkù, bwalu kàvwà kenza bwà muntu mulùme.

64 Nè Bible ùdi wàmba nè: “Ncinyangu ku mèsù kwà Nzambi, bwà muntu mukàji kubìlwàtaye.”

65 Nè bilaabu byà ku mishìku búngì cyanààna, nè mèsù èndè bu malààle bu matàbàle, kwambayè nè: “*Cikampàndà cìdi penyì?*” wàmbara mwànà wa balùme mukesè awu.

Awu nè: “Mmunyì mùdì utèkemena bwà mèmè kumanya?”

66 Kwambayè nè: “Vùluka nè, ncìvwaku mwalùkile kumbèlu to too nè ku díbà isambòmbò jaajaaja mu dindà emu.” Pèndè kàyì nànsha nè bidimu bipite pa dikùmi nè bìbìdì to.

67 Mpindyewu, Yesù, pàvwàye nè bidimu dikùmi nè bìbìdì, uvwa cileejilu cyètù awu, wàkamba nè: “Kwèna mumanyè nè bivwa bikèngela bwà mèmè kwikala mudìfile ku maalù à Taatù Wanyì anyì?”

68 Kabyèna bikèmesha to mùdì Díyì dyà Nzambi diikàle cintu cyà ku mpùùkàpùùkà leelù ewu. Ndipàcisha kùdi mèyì àbúngì mashiilèshìilàngàne, bintu búngì cyanààna bìdì bìdìpùwisha nè bìdyùmusha. Mbikafikè mu mùshindù wà nè bìdì bipàcisha byumvwilu byètù, mu mùshindù wà katùyì mwà kutèeleja Díyì

dya Nzambi to. Byumvwilu byètù, byà mùvwàbi bikèngela bwà twètù kudinyùkusha, nè kufika ku dyumvwa nè nudi balume nè bakàji, nè nudi bufùki bwà Nzambi, nè nuvwà batèèkiibwe mwaba ewu bwà kuMukwàcila mudimu. Kàdi dīyī dya Sàtaanà nè baprophetà bàà mashimi nè: “Kaa, ikalà wa cyena leelù’s!”

⁶⁹ Ànu mûmvwà ngàakula kùkaadi ndambù wa matùkù, mvwa ndwa mu èkèleeziyà, ke mèmè kukàngula cisanjì cyànyì. Ki mèmè kuumvwa ndongamu kampàndà wa mu Louisville, wákamba nè bàvwa bàlongesha bàna bààbò, mu maèkèleeziyà, bwà kunwàku ànu nè dicincika. Bàbàvwija bàà cyena leelù, mu mùshindù wà nè kabèèna bàkafika ku dipicisha to.

⁷⁰ Kaa, bìvwa bikèngela bwà kubàlongesha Kilistò, kī nkunwa to. Nènku aci’s necinyangakajè nè kupiisha diiku kanà dyònsò edi. Mmunyì mùdiku Dīyī dya Nzambi mwà kwakula munkaci mwà dīkù didì dikwàcike nè maalà à wiskī, nè meeji ààbò manyangakaja kùdì mwīshì wà mfwankà nè dinwà dya maalà, ma fetè à butùku bujimà?

⁷¹ Bantu bàdì bindilà Nzambi, bàdì bàbwela mu Bwikadi Bwèndè. Nènku kubwela mu Bwikadi bwà Nzambi mbyenze ànu bu kupàtuka kumpalà kwà dībà mu dīndà, pàdì lumuma nè bilòngo biikàle byònsò byà kalolo. Paùdì ubwela mu bwikadi bwà muntu wa mùshindù awu, udi umanya nè ùvwa nè Nzambi.

⁷² Mukàjàànyì kungambilayè, patùvwà twenda tupweka, mu dīndà emu. Yèyè nè: “Billy, ncyèna muswè kwamba eci bwà kwela muntu kampàndà cilòngò to. Kàdi,” mwàkambàye, “makeèlèlè dīlòlò awu,” ngèèla meeji, anyi dimwè dya ku malòdòlò, yèyè nè: “Mvwa musòmbe ku luseke lwà umwe wa ku bakàji bakesè bàà ba-Amish, nè inàbànzà mutekète muvwàle kafulu kakesè ku mutù.” Yèyè nè: “Nè bìvwa bìmwèka patòòke nè mukàji awu ùvwa nè Yesù, bwalu ùvwa nè kalolo. Musùùkà wèndè ùvwa mupòle. Mèsù èndè àvwa matòòke.” Kakùyì mpèkaatù anyi cintu nànsha cimwè cyà kusokoka paanyimà to, anyi ní ncinyì cyònsò. Ùvwa mu Bwikadi bwà Nzambi. Byumvwilu byèndè kabivwa bicipàle, kùdì maalà à wiskī nè mfwankà wa cipàtu, nè bintu byà mīshindù yònsò byà pa buloba to. Ùvwa mupetè cyashima cyà mu Bwikadi bwà Nzambi, ùbala Bible wèndè, ùlonga Dīyī dya Nzambi.

⁷³ Kàdi, twètù beena Àmèrikè bàà cyena-leelù aba, citùdì twenza’s wè! Nè baprophetà bàà mashimi paanyimà pàà cyambilu bàmba nè mbìmpè. Ndi bu udi nè meeji à kwamba eci nùnkù. Mèmè mupùile, Nzambi àmfwilèku luse. Ndi mutwishìibwe nè bààbùngì bàà kùdìbò kī mbamanyè Nzambi to. Nè disangisha kadyàkwikalakù nè nsòmbelu mutùmbùke mutàmbe wa mpaasàtā wadì to. Kabyèna bikèmesha to mùdì Mufundu wàmba nè: “Balami bàà mikòòkò aba, mùshindù mwinè wùdìbò batàngalàje cisumbù cyà mikòòkò’s! Dyàkabi

dyàbò. M'matàmbà àdì kaàyi àkwàma mamuma, ikala mwà kukòshiiibwa nè kwòshiiibwa.”

⁷⁴ Bintu byàbùngì be bwà kupàcisha byumvwilu byà bantu leelù ewu's! Kaa! Kàdì munkaci mwà biine byònsò abi, nànsha mùdiku dipàcisha dyònsò nè dīyì dyònsò didiku mu buloba leelù ewu adi's! Àmwè à ku ôwò, mmēyì à bisànkasanka. Àmwè à ku ôwò àdì—àdì mēyì à mpèkaatù, bwà kuseeswisha bantu. Kàdì pamutù pàa kantu nè kantu kàa cyòci aci, Bulelèlè bwà Nzambi bùcidi ànukù nè: “Ewu watèèleja Dīyì Dyànyì nè wàNdonda awu's!” Balùme nè bakàjì bìikalà mwà kutèèleja Dīyì dyà Nzambi: Nzambi ùcidi ànu mwindile bwà kwakula nè muntu nkààya yònsò wàkàngula maci èndè bwà kuumvwa Dīyì dyà Nzambi.

⁷⁵ Muntu mulùme, nànsha mwikale nganyì, nè mpaasàtà... Misangu yàbùngì, bantu bàtu bàmba nè: “Kwèna mwà kwenza *cikampàndà* anyi? Kwèna mwà kulwa lùbilu *apa* anyi? Kwèna mwà kwenza *cikansanga* anyi?” Kaa, mēmè ndi munangè kucyèenza. Kàdì bikèngela nshaalè mu Bwikadi bwà Nzambi pangìikalà nè cyà kwenza cintu mùshindù cijaalàme. Dìbà adi bantu bàdi bàmba nè: “Kaa, Mwanèètù Branham ngumwe wa ku baa cyenda-nkààya aba.” Kì nnànkù to. Ntu munange bantu, kàdì kùdì ànu binunu nè binunu byàbò's. Kàdì ndi nè cyà kushààla Nendè, bwà kujandula cidiYe muswè bwà mēmè kubàmbila. Mu mwaba kampàndà, tèèleja ànu cyanààna, Yèyè neikalè nè cintu kampàndà bwèbè wèwè, cidiYe muswè bwà wèwè kumanya.

⁷⁶ Mpaasàtà, kwikadikù nè midimu mipitepìte bùngì bwà wapanga mwà kushààla mu Bwikadi nè kutèèleja Dīyì Dyèndè to. Nzambi ùtu misangu yònsò ànu ùshààla mukwàte ku Dīyì Dyèndè. Nènku nànsha bikondo mwà kwikala bibì byà bìshì, nànsha èkèleeziyà wenù mwà kulongesha bibèngangana nè cyòci aci, Yesù Kilistò ùcidi ànu muswè kwakula kaaDīyì kakesè kapolè aku kùdì muntu kanà yònsò udi muswè kuMutèèleja awu. Yèyè ùcidi ànu mudilongòlòle bwà kucyèenza, bu twètù ànu mwà kutùùkija.

⁷⁷ Kàdì tudi tubwelamù, tulubakana, twamba nè: “Amba tǔng, mpaasàtà, ndikù mwà kashààla wa mu èkèleeziyà ewu anyi?”

“Udi mufùmìne mu èkèleeziyà kaayi?”

“*Kampàndà.*”

“Èè, tùtwàdila mukàndà wèbè awu.” Kaa, èkèlekèle!

“Ndikù mwà kashààla wa mu èkèleeziyà ewu anyi?”

⁷⁸ “Kaa, èyowà's. Bànda kumpàlà eku, nènku netùkumyamìnè nè màyi ndambù, nè kufùnda dīnà dyèbè mu mukàndà. Nènku bàdi bàkwela mwoyi ku cyanza wà buunyànà.”

⁷⁹ Èè, Diswa dyà ba-Franc-maçons s'didi nè bulongàme bwìmpè kutàmba abu. Mbulelèlè. Diswa dyà ba-Franc-maçons

nè maswa makwàbò ónsò kaenà nè bwalu to, kàdi kabyèna ànu nzùbu wa Nzambi to. Amu ki mùdi Nzambi wàkula. Maswa awu àdi àteeta kukuvwija wa nsòmbelu mulenga, kàdi Nzambi ùdi ùkuvwija mwakàne ku Yesù Kilstò, Mwan'Èndè. Mpindyewu, kùdi tunungu twà dimanya dyà nsòmbelu bwà cyôci aci; Nzambi ùdi nè Dilediibwa dipyadìpyà bwèbè wèwè.

⁸⁰ Kàdi tèelejàku kaaDiyi Kèndè kakesè kapolè aku. Yònsò wa kunùdi nwènù bàdi bàjikula nè nudi beena Kilstò abu, ditèèkà mupùwe kumpàlà Kwèndè. Kùlekedikù disukula dyà bilàmbà dikupangisha to. Kùlekedikù mudimu wùkupangisha to. Kùlekedikù kantu nànsha kàmwe kàkupangisha to. Kùlekedikù muntu nànsha umwe ùmanyà cyùdi munkaci mwà kwenza to. Ndà ànu kumpàlà Kwèndè. Bànda mu diitu mwaba kampàndà. Pàtukà uye ku mpengà kwà njila. Bwelà mu kazùbù kàà cisokomenu nè winjilè ciibi. Pàdi bânà mu kàlaasà apu, twàku binù muntwamu. Udi mumvwè mèyi à mîshindù yònsò myaba yònsò, kàdi pwekà panshì nè ùshaaleku too nè pààpùwà mèyi awu nènku ùbangè kubànda. Aci's necikushintùlùlè. NeCikuvwijè mushiilàngàne, mwàkenzelàCi Samwèlè mutekète amu. NeCikwenzèle cintu kampàndà bu wèwè ànu mwà kucyènza. Mpindyewu, neCikuvwijè civwà cikèngela bwà wèwè kwikala aci. NeCikuvwijè mwena Kilstò wa mùshindù wùvwà wùkèngela bwà wèwè kwikala awu.

⁸¹ Mpindyewu tùumukaayi ku ditùkù dyà cyena-leelù edi, tuye ku ditùkù dikaadi dipite. Twàlukilàayi ku matùkù à bikondo byà ku cibangidilu awu. Nè Dìyi dyà Nzambi edi ndilwè kùdi bantu mu mîshindù yònsò yà mwoyi, mu bikondo byònsò. Nànsha wèwè mwikàle cidimè, nànsha wèwè mwikàle mutedi wa bisàbaatà, cyònsò cyùdi mwà kwikala aci, Nzambi ùcidi ànu wàkula. Wèwè mwikàle ngènzàmpèkàatù, wèwè mwikàle mukàji wa masandi, ndumbà, wèwè mwikàle kanwàyì wa maalà, wèwè mwikàle (cinyi?) cidimba cyà èkèleeziyà wa pa kaaba, cyà ku dîna—cyà ku dîna, cyònsò cyùdi mufwànyine kwikala aci, Dìyi dyà Nzambi dicidi ànu dindile bwà kwakula neebè.

⁸² Ndi ntùma meeji mpindyewu kùdi Mòsà, pàkaavwàye nè bidimu makùmi mwandamukùlù apu, nè ùvwa nè bidimu makùmi mwandamukùlù byà dilongeshiibu dyà tèolòji. Nè yèyè ùvwa mumanyè Mifundu; ùvwa muYimanyè bîmpè. Nè yèyè ùvwa nè mulayì kùdiye nè, yèyè nguvwa nè cyà kwikala musùngidi wa cisàmbà cyèndè. Kàdi, nànsha nànkù, mumanyè ànu Mifundu nè mwikàle cidimba cyà—cyà mmwènekèlu wa kwisùkwisù cyà èkèleeziyà wa cyena leelù awu mu ditùkù adi, yèyè kwangata cintu aci mu byanza byèndè sungasunga nè kuteeta bwà kucyènza. Kushebeyayè mwena Èjiipitù. Udi mumòna cyùdi wenza paùdi kùyi utèeleja Nzambi anyi? Udi ànu ubisopakaja.

⁸³ Nènku pàdi dyabùlù, mu dindà emu, mufwànyine kwamba nè: “Kùbàtijiibu to.” Mukwàbò ùvwa mufwànyine kwamba nè:

“Kaa, enza nànkù pashìishe.” Umwe mmufwànyine kwamba nè: “Mbìmpè wikalè mutwìshìibwe nè udi mumanyè cyùdi wenza.” Kàdi mukwàbò wàmba nè: “Neùjimijè cikondo cìmpè.” Mùshindù wùmwèpelè wà kulongolola cyôci aci, ngwà kuya naaci ku Diyì dyà Nzambi. Kàdi bantu, leelù ewu, kabèèna bàmwèka bu nè mbaswè kwenza nànkù nànsha.

⁸⁴ Nènku, Mòsà yèyè, ùvwa muyè kùdi baa laabi bàà batàmbe bwìmpè, kàdi bôbò abu bàvwa bàà mmwènekèlu wa kwìsùkwìsù nè bakwàtè mashìka. Ùkaavwa mutèèlèje bwalu-bulonda bwàkamulondelà mamwèndè, mwàkadiye musokoka mu malèngà, nè mùvwà ngandù yà minène menemene ayi kayiyi mwà kumulengakù to. Mùshindù mene wùvwà mwànà mukesè wa mu dibòkò awu, wenda upweka mulèlème pa musùlù apu’s. Mwaba wùvwà. . .

⁸⁵ Ngandù minène yà kale yìvwa ànu midyundè. (Eci mbwà bàna bakesè.) Yìvwa midyundè, bwà didyà dyà bàna bakesè abu. Bàvwa nè bakàji bakolè bàà maùlù makòbàme, bampùlushi bakàji, bàvwa kacya kabàyiku balelè mwànà to, kabàyi bamanyè nè dinanga dyà mwànà ncinyi to. Mòna’s, bàvwa bàpàtuka kuntwaku bàbàngata nè bàshipa bàna bakesè bàà mu mabòkò abu, nè bàbìimansha mu musùlù amu. Ngandù minène mikùlākajì ayi yìvwa ànu midyundè, bwà mùvwàyi yìdya bàna bakesè abu.

⁸⁶ Kàdi, nànsha nànkù, Nzambi kutèèka pa mwoyi wà maamù bwà kutèèka mwanèndè wa mu dibòkò awu mu lufù. Kanwènaayikù numòna nè cìvwa cìfwànyikijilu cyà Kilistò anyi? Yèyè wàkabwela buludi mu lufù. Nè yònsò wa ku ngandù minène ya kale awu ùvwa ànu mwà kubanda too nè ku kasakà kakesè kàvwà kènda kàpweka nè musùlù aku. Nudi bamanyè bwà cinyi kayìvwa mwà kucyèenza, bwà cinyi kayìvwa mwà kudyà mwànà mukesè wa mu dibòkò awu anyi? Kwàkadi Mwanjèlò musòmbè mwaba awu. “Umùkaayi apa.”

⁸⁷ Bwà cinyi? Nzambi ùtu ùtùmina Banjèlò Bèndè diyì bwà kutàngilabò bantu Bèndè. Kùcìinyikù to, munanga wanyì. Nzambi ùdi munkaci mwà kukutàngila. Dyabùlù ùdi mwà kuteeta bwà kukwenzela cintu kampàndà, kàdi Nzambi mmutàmbe bunène. Nwamònu anyi?

Pa nànkù, ngandù minène ayi yìvwa nè cyà kunyeema kuya kule nè kàtungà kakesè aku.

⁸⁸ Kàdi, nànsha nànkù, Mòsà ùvwa mumanyè bintu byònsò ebi. Kàdi, nànsha nànkù, paanyimà pàà bidimu makùmi ànaayi byà dilongesha, nè pashìishe mu cipèèla, yèyè ùcìvwa ànu ùteeta bwà kwangata cintu aci, mu byanza byèndè.

⁸⁹ Tudi bamanyè Bible, cidi Nzambi wàmba bwà kwenza, kàdi pèètù twamba nè: “Èè mpindyewu, netwènzè nè eci cìikalè mùshindù *kampàndà*, cidi ànu nè, matùkù à bishimà, kaènakù kàbìdì nànkù to. Tudi bamanyè nè katwèna twitabuuja nè tudi

tubimòna kàbidi to, nè tudi twitabuuja nè matùkù à bishimà àkaadi mapite. Nè dimyaminangana dyà màyi ndimpè ànu mùdì diinyijangana dyà mu màyi amu. Nè ‘Taatù, Mwànà, nè Nyumà Mwímpè’ mbímpè ànu mùdì Dìnà dyà Mukalenge Yesù amu. Pa nàнку netwikalè ànu. . . Bakwàbò bònsò nebiikalè bàya mùshindù awu, pa nàнку netwikalè ànu mwà kucyènza, twètù pèètù.”

⁹⁰ Mòsà’s wàkadi mùsàlaayi. Ke kudyàmbidilayè nè mùshindù wùvwàye mulongèshìibwe awu, bu mwàkadiye mùsàlaayi, nè ùvwa ànu mwà kushebeya beena Èjiipitù abu nè cyanza cyèndè. “Bivwa mwà kwikala bímpè ànu mùvwà cyàkenzà Nzambì aci.” Nukààdikù bakwèlèlee meeji anyi? Bantu bònsò bàdi bàpiisha Mòsà bwà kushipa kwà muntu umwèpelè. Kàdi kwalukilaye kuntwaku nè dilaabiibwa dyà Nyumà Mwímpè nè kushebeyayè cintu cyònsò mu kaabujimà, kakùyì muntu nànsha umwe ùfyotola mukana to. Wàkashebeya cilwilu cyònsò cyà Pàlò aci, kàdi Nzambì ùvwa mu bwalu abu’s. Nzambì kàvwa mu bwà dyàmbedi abu to.

⁹¹ Ke pashìishe Mòsà, mupàte ànu tètè nè tèlòlòjì wa èkèleeziyà awu, yèyè’s ke uvwa nè cyà kwikala pàlò uvwa ulonda. Nènku tudi tumusangana, kàyì ànu mumanyè Nzambì to.

⁹² Kàdi dindà kampàndà, lwà paanyimà pàà cipèèlà pààpa, muntu mununu wa mvùla makùmi mwandamukùlù, mwedi wèndè mulembèlèle panshì, wàkamòna cipuka cilàkuka kapyà. Ke kukudimukayè bwà kumòna cìvwa munkaci mwà kwenzeka. Nènku mmwenzè ànu usemena pabwipi nè cipuka aci, kuumvwayè Dìyì. Bivwa bikèngela bwà Nzambì kumutuuyishayè munda mwà bidimu makùmi ànaayi, kumpàlà mene kwà kwakulaYè nendè. Kàdi twètù katwènakù tushààla batùùkije mu tusunsa dikùmi, bwà Nzambì wàmònakù mwà kwakula neetù to, nè mutooyi wònsò nè mbimbimbì bitùdì naabi mu ditùkù edi abi.

⁹³ Kàdi nànsha nàнку, Mòsà, paanyimà pàà bidimu makùmi ànaayi, mwimàne mwaba awu, nè mu Bwikadi bwà cipuka aci. Nènku Dìyì dimwèpelè dyàkamubiikila adi, yèyè wàkamanya byàbùngi pa bwalu bwà Nzambì mu tusunsa tùtaanu, paanyimà pàà cyòci aci, kutàmba bidimu byònsò makùmi mwandamukùlù byà dilongesha byàkamulongeshabo abi. Cyàkamuvwija muntu mushiilàngàne.

⁹⁴ Necikuvwijè muntu mulùme nè mukàjì mushiilàngàne, bu wèwè ànu mwà kushààla mupùwe ntàntà bule bukùmbàne bwà kutèèleja Dìyì Dyèndè, mwàkenzà Samwèlè amu. Shààla mupùwe. Kùsaluku to. Wèwè muswè cintu kampàndà cyà kùdì Nzambì, uMulòmbè; pashìishe shààla mupùwe nè ùtèèlejè, ùmòne ciikalàYe mwà kwamba pa bwalu abu. Kàngulà wèwè ànu mwoyi wèbè cyanààna, wamba nè: “Kàdi bishi bwà aci, Mukalenge Yesù?” Shààla wèwè ànu mwaba awu. Yèyè kàyì

mwandàmùne mu mèbà àtaanu à kumpàlà awu to, dībà adi indilà makwàbò. Yèyè kàyi mwandàmùne leelù ewu to, dībà adi neÀndamunè mààlabà. Yèyè kàyi mwandàmùne lumingu elu to, Yèyè neàndamunè lumingu lùlwalwà elu. Shààlakù too nè pàdìYe wàndamuna.

⁹⁵ Tèèleja Dìyì Dyèndè dyàndamuna, munda mwà mwoyi wèbè, dyàmba nè: “Èyowà, Mémè ndi Mukalenge udi ukwondopa.” Dībà adi kwònsò kwàjiki. Wèwè udi mwà kukòsa bwalu dībà adi. Nwamònu anyì? “Mémè ndi Mukalenge Udi ufwa luse ku mpèkaatù yèbè yònsò. Mpindyewu ndaaku kwènjì kàbìdì mpèkaatù to. Mémè ncyèna nkupìisha nànsha.” Dībà adi udi mwà kuya mudishikàmine. Udi bimpè. Kàdì mbimpè wìkala mutwishìibwe nè udi mùmvwè Dìyì adi dyàkula. Mòsà wàkaDitèèleja. Yèyè’s ùvwa muntu mushintùlùke.

⁹⁶ Tàngilàayi Yeshàayi, mupròfetà awu, bu nsongààlùmè, byònsò bìvwa byènda bimpè bwèndè yèyè, mfùmù munène mwanyishìibwe Uzìyà awu, mu matùkù awu, muntu mwakàne, muntu mwimpè, ùvwa munangè Yeshàayi, bwalu ùvwa mumanyè nè ùvwa mupròfetà. Nè pa nànkù yèyè ùvwa mweyèmène ànu pa dibòkò dyà mfùmù. Cyònsò civwàye muswè aci, mòna’s, Uzìyà wàkamupèeshaci. Nè musangu wònsò wùvwàye ùkèba cintu kampàndà, mòna’s, mfùmù mwimpè awu ùvwa mwà kumupèeshaci. Kàdì kulwakù cikondo cyàkafwà mfùmù awu.

⁹⁷ Ditanta dítu misangu yònsò ànu dinyanga bantu. Aci’s ncintu cicolè bwà kwamba. Kàdì ditanta dítu dìseemeja muntu kule nè Nzambi. Nzambi wàkaakula kaaba kampàndà, mu Bible, cintu kampàndà cyà bwen’eci, nènku Wàkamba nè: “PaNgààkakubèneshà, nè kukupèesha bintu byàbùngì. Paùvwà mupèlè nè kùyi nè kantu nànsha kàmwè to, Mémè kulwa kùdì, nè wèwè kuNtèèleja nè kuNkwàcila mudimu. Kàdì pàNgààkakubèneshà nè kukupà tètè mu nzùbu tètè pambèlu, ke wèwè kuNkoma nyimà.” Aci’s ke cìdì Àmèrikè mwenze, batàngile kwà cyanààna.

⁹⁸ Ke cìdì èkèleeziyà myenzè’s. Nudi mwà kusòmba mu masangu, nè kwikala nè nzùbu minène milenga, nè mìliyò yà ndola ku . . . kutèkamù, nè byònsò ànu bipepèlè nè mwàbì mwònsò. Kabyèna bikèmesha to mùdì kùyi nè dībà dyà kutèèleja Dìyì dyà Nzambi. Kàdì indilà too nè pààlwà dībà dìdì aci cyùmushìibwa, dībà adi neùjinge bwà kuDitèèleja. Byònsò bìdì ànu bimpè mpindyewu’s, kàdì dībà dilwalwa diikalàbì kabiyì mùshindù awu to.

⁹⁹ Pa nànkù, Yeshàayi, ùvwa mwà kweyemena pa dibòkò dyà mfùmù. Nè yèyè ùvwa nsongààlùmè mwanyishìibwe, nè kùvwà nyumà mulenga mu nsongààlùmè ewu, pa nànkù ke mfùmù awu kumunangayè. Kàdì dìmwè ditùkù, byeyemenu kuumunyèngiwbabi. Mfùmù awu kufwà. Nènku pàakafwà mfùmù, dībà adi byàkakèngela bwà Yeshàayi kwendayè

nkààayendè. Ke pashiiishe kubangayè kukènzakana, ke kusanganayè nè muntu yònsò kàvwa bu mfùmù awu to.

¹⁰⁰ Nenwipaciibwè, dimwè dyà ku matùkù àdì panshì aa, mu bisumbù byà pankaci pàà mǎngumba byà mùshindù ewu ebi. Nekùlwe cikondo cyàkèngelabi bwà nwènù kwikala bàà mu bulongolodi kampàndà, cyanaàna kanwèna mwà kukuukwila to. Bu munùdì bamanyè's, Mifundu yìdì yamba nè nebiiikale nànkù. Mpindyewu's bàdì ànu banwèlulwila cyanaàna. Kàdì nekùlwe cikondo ciikalàku dyenzejangana dyà ku makàndà, bwalu cimanyinu cyà nyama wa lwonji cìdì nè cyà kulwa. Anyì nenùkashààle bàà mu nsangilu wa maèkèleeziyà, nyama wa lwonji ànu mùdìbì mu Loomò amu, anyì kanwàkukuukwilakù to nànsha kakesè. Aci's ke cìdì Mifundu yamba. Dìbà adi's ke diikalàbì bikèngela bwà wèwè kwela mbilà mwàkenzà Yeshàayi amu.

¹⁰¹ Ke kupwekayè mu ntempèlù, nè kufikayè ku dyumvwa dìbà adi's. Kwelayè byanza byèndè muulu è kwambayè nè: "Éyì Mukalenge, mèmè ndi muntu wa mishikù mibiipe." Wèwè udi wela meeji nè udi mwîmpè, kàdì indilà too nè pààlwà cikondo aci. "Ndi musòmbèle munkaci mwà bantu bàà mishikù mibiipe." Cyàkenzàye ncinyi? Wàkashiikila.

¹⁰² Nènku dìbà dyùdì ushiikila bwà cintu eci, cintu kampàndà necyènzekè. Kwèna mushiikile menemene to. "Kaa, èè, mèmè's ndi mukashààle wa mu èkèleeziyà. Aci's ncikòse bwalu." Kàdì bikèngela wikalè mushiikile bwà bwalu abu. Bikukèngela bulelèlè ùjinge ànu Nzambì.

¹⁰³ Yesù wàkamba nè: "Bàà disànka ng'aba bàdì nè nzala nè nyòòtà yà bwakàne, bwalu bóbò nebùjiibwè."

¹⁰⁴ Kàdì paucidì ànu musànkishiiibwe nè bintu byà pa buloba, mmunyi mùdì Nzambì mwà kwakula neebè? Wèwè udi wamba nè: "Nzambì kacya kì mmwakùle naanyi to." Bwà cinyi? Yèyè mmuswè nànkù. Kàdì wèwè udi mùle tètè menemene nè bintu byà pa buloba. Ke lutàtù lutùdì naalù leelù ewu ndwòlò alu. Tudi tutèeka dìbà dyètù dyònsò pa bintu byà pa buloba, nè bisànkasanka byà pa buloba, kàdì katùyì tupèesha Nzambì dìbà to. Mbulelèlè.

¹⁰⁵ Mpindyewu, tudi tujandula nè Yeshàayi wàkashiikila. Ke kwelayè lubilà lukolè, nè kutondayè mpèkaatù yèndè, nè kutondayè mpèkaatù yà cisàmbà. Pààkajikijàye kutonda, kuumvwayè mutooyi kumutù kwèndè aku. Nènku pààkabàndulukàye, ke Bakèlùbà abu's, bàpaapala bàtwa kumpàlà bàtwa paanyimà mu nzùbu amu. Mapwàpwà mabwikile kwisù Kwàbò, nè mapwàpwà mabwikile pa makàsà Àbò, nè bàbùuka nè mapwàpwà, bèèla mbilà nè: "Wa cijila, wa cijila, wa cijila, Mukalenge Nzambì wa Bukolè bwònsò."

¹⁰⁶ Cintu kampàndà cìvwa munkaci mwà kwenzeka. Yeshàayi wàkashiikila. Nzambì wàkaditwa mu mudimu. Ke Yeshàayi

kwelayè lubilà lukolè nè: “Ndi nè mishikù mibiipe,” bwalu Dìyi dicivwa ànu difùma ku dyakula. Dyàkamushintulula.

¹⁰⁷ “Wàya kaaba Kèètù nganyi?” mwàkambà Dìyi adi. “Nganyi wàya? Nganyi udi muswè kwimana pankaci, munkaci mwà musùmbà wà beena tèòlòjì ewu? Nganyi wàya mu ditùkù edi, nè kwamba nè Mémè ncidi ànu Nzambi? Nganyi wàya kapiisha bukooya bwàbò? Nganyi wàpandulula màngumba àbò nè kwibaka cyàkàbidi makolè à Nzambi udi nè mwoyi? Wàya nganyi?”

¹⁰⁸ Yeshàayi wàkamba nè: “Mukalenge, kumpàlà kwà mémè kuya, bikèngela ngiikalè mushintùlùdiibwe.” Bùmwe bwà ku bwòwà bukesè nè dilubakana bìvwa nè cyà kumushiila kaaba.

¹⁰⁹ Ke mwikalàbi kàbidi bwà muntu nkààya yònsò udi Nzambi ùbìkila ewu’s! Bikèngela ùlediibwè cyàkàbidi, mushintùlùke nè muvwijiibwe mupyamùpyà. Kí ndidifwànyikijila to; kàdi byà byùmukila munda mwà mwoyi wèbè, cintu kampàndà cidì cyà bushùwà cyènzeka. Nè umwe wa ku Banjèlò... “Nwènu balòmbe, nenùpetè.”

¹¹⁰ Umwe wa ku Banjèlò wàkaya ku cyoshelu cyà cyamù cyà mitakù, nè kwangata nkwatù nè kwolola cyanza kwangata dikàlà dyà Kapyà kàdi nè mwoyi, nè kuya lubilu kùdi Yeshàayi nè kuditéèka mukana mwèndè. Yèyè nè: “Mpindyewu udi mukezuke. Ndàaku, akula Dìyi.” Yeshàayi wàkashintuluka paanyimà pàà yèyè mumanè kuumvwa Dìyi adi.

¹¹¹ Pashiishe mu bidimu byèndè byà ndekeelu, wàkafùnda Bible mujimà, wàkabangila ku Genèsè nè kujikijila mu Bwàkabuulwibwà; kùdi Mikàndà makùmi àsambòmbò nè yisambòmbò yà Bible, kùdi nshapità makùmi àsambòmbò nè yisambòmbò yà Yeshàayi. Bwà cinyi? Bwalu wàkashìikila mu cikondo cyàkamònàye bitàmbe kujingiibwa bikolè.

¹¹² Danyèlè mu Baabùlòònà mwàmwa, bu mutwàkùdi bwalu bwèndè makèèlèlè dilòòlò awu, ùvwa mudipàngàdikile munda mwà mwoyi wèndè bwà nè kàvwa mwà kudikooyisha nè malongesha à cyena Baabùlòònà to. Kàdi dīngà ditùkù, muntwamu, Danyèlè wàkapeta dijinga. Nè yèyè ùvwa mumanyè nè ùvwa muswè kutèeleja Dìyi dyà Nzambi, kàdi pèndè’s ùvwa nè Mifundu. Kàdi bìvwa bimukèngela bwà kutèelejayè Dìyi dyà mukana dyà Nzambi. Nè kupwekayè ku musùlù *kampàndà*. Kàdi kààkapweka ànu kuntwaku nè kwimanyika ditempu dyèndè nè kutwà binù panshi mu malèngà amu, kwamba nè: “Mukalenge Nzambi, ndi muswè kuKutèeleja. Udi penyi?” To. Kwèna ucyènza mùshindù awu to. Yeshàayi wàkangata ditempu dyèndè, nè bendeshi, nè kupwekaye ku musùlù aku nè kubààlujayè. Ùvwa nè cyà kushààla too nè pàakatèelejaye. Ke mùshindù ngwòwò awu. Wàkashìikila bwà bwalu abu.

¹¹³ Byàkakèngela bwà kuumukayè kùdi bàsàlaayi bònsò, nè balongi bàà mabùlunga bònsò, nè beena meeji abu, balongeshi

bònsò bàà tèòlòjì, nè bikwàbò, bàvwà bàteeta kumwambila nè: “Eci! Enzà *cikampàndà*, Danyèlè. Enzà *cikansanga*, Danyèlè.” Kàdi yéyè wàkaya kule nè byònsò abi. Ke mùshindù wùdibi bikèngela bwà wèwè kwenza awu’s. Ke kupwekayè ku musùlù aku, nè kushààlayè kuntwaku munda mwà matùkù makùmi àbìdì nè òmòwè, ùlwàngana mvità nè Mwanjèlò wa Mukalenge.

114 Kàdi mbatwámibile nè yéyè wàkatàngila pamutù pàà màyi. Wàkamònapù Mwanjèlò mwimàne, nè dikàsà Dyèndè pa buloba búme nè pa mbù. Nè wàkeela byanza Byèndè muulu nè kudicìpa kùdì Ewu udi nè mwoyi kashidi nè kashidi awu nè: “Pìikalà bintu byàkadì Danyèlè mumòne mwà kwenzeke, cìkondo kacayàkwikalakù kàbìdì to.” Wàkanèngeshiibwa munda mwà matùkù makùmi àbìdì nè òmòwè bwà bubì bwà buloba abu.

115 Nènkù pìikalàbì nè Yéyè wàkanèngeshiibwa munda mwà matùkù makùmi àbìdì nè òmòwè bwà bubì buloba abu, mu matùkù à beena Peelèsà, ncinyì cìdìYe mwà kwikala mu ditùkù edì’s? Mu ntàntà bule munyi mùdìYe mwà kunèngeshiibwa’s? Kàdi diitabuuja dìdì kadiyì dífwa adi, nzala ayi nè dìjinga mu mwoyi wà muntu, dìkalà kadiyì dibèngela Nzambì to, kàdi dìikala mwà kushààla ànu kacya dyàkwàta too nè pàdì Nzambì wàkwila mu Dyulu. Kanwèna mwà kunàya nè eci, nè Èvànjeeliyò ewu to. Kì ngwa dinàya Nèndè to. Ùdì nè cyà kulenga cìdì cimuludikila, misangu dikùmi pa dikùmi. Bikèngela cìikalè cipwàngàne, bwà cyanààna kì ncilelèlè to nè kacayàkukùmbanakù to. Bikèngela cìikalè cipwàngàne. Danyèlè wàkasambila.

116 Tudi tusangana mu Bible, lwà mu nshapità wa 8, nshapità wa 7 anyi wa 8 wa Mukàndà wà Byenzedi, nè, Mufààlèsà mukesè, wa mudyènze yéyè mwìnè dyèndè nè Shaùlà. Kaa, yéyè’s ùvwa mwena tèòlòjì, èyo. Wàkadì mushikàme mu dilongesha dyà Gamaliyèlè nè wàkadì nè Mifùndù yònsò, ànu mùshindù wùvwàbì bikèngela, bilondèshilàngàne nè beena tèòlòjì bàà ditùkù adi, kaa, wa wèndè mùshindù nè mudyènze nkààyèndè. Kè kumònayè bantu bènta cintu kampàndà cìvwà cyà nymà, kàdi tèòlòjì wèndè mukwàtakaja kùdì bantu awu kàvwa ùpetangana naaCì to.

117 Ndifwàangana kaayìpu nè leelù ewu’s wè! Wa kweyemena nè wa meeji matòoke mu mwoyi wèndè, ànu mùdì bantu bààbùngì amu, bàdì bèèla meeji nè bantu bàdì balediibwe cyàkàbìdì mbapàle. Bàdì bèèla meeji nè dyondopa dyà kùdì Nzambì nè makolè à Nymà Mwímpè ncintu kampàndà cìdìbo bààkula, kàdi’s ncilelèlè.

118 Nènkù pàvwàye mu njila mutàngile ku Damàsèkè, dīngà ditùkù, mwikàle nè mēyi matùma kampàndà mu mpaaya mwèndè, à kùdì—à kùdì mwèpiskòòpò wa èkèleeziyà, bwà kupwekakù nè kubùtula musumbà wònsò wà bansantu babùnguluki bàà mu malaba bàvwà bèèla mbilà mikolè nè

bèèla mikunda abu, nè—nè bàtùpika bàya muulu bàalukila, nè bààkula mu myakulu yà ku baabèndè, nè—nè bwondopa babèèdi. “Nènku, mòna’s, s’mmusumbà wa badémons,” mwàkamba beena tèòlòjì. “Pwekaku ùbàkwàtè, nè ùlwe naabò mwab’ewu beela ku nkànu!”

119 “Bushùwà. Ku mudimu wèbè ànu muwǎmbì amu, mwèpiskòpò!” Kaa, ekèlekèle! Kaa, yèyè’s ùvwa muntu munène. Ùvwa nè D.D., Ph. D., nudi bamanyè’s. Ke yèyè kutupikayè pa kàbalù kèndè, nènku ke yèyè uyààya wàwa, nè bantu bàkamufilà.

120 Kàdi mu njila wèndè amu, lwà mu nkànkàlà, Cintu kampàndà kumbyànkula mu malaba. Nè kubùngulukayè mu lupwishi bu mutombòke, lututu ku mishiku. Ke kutèèlejaye Dìyì dyàmba nè: “Shawùlà, Shawùlà, udi uNkengesha bwà cinyi?” Cìvwa ncinyi Aci? Kì mmwena tèòlòjì kampàndà munkaci mwà kwakula nendè to, kàdi n’Dìyì dìfùmina mu Dyulu nè: “Udi uNkengesha bwà cinyi?”

121 Ke kubùngulukayè mu lupwishi amu, nè nkòfì yèndè yìvwa yònsò myùle tètè nè lupwishi, nè binsònjì bìmupwekela pa matàma, pàmwàpa, Yèyè nè: “Mukalenge, Wèwè udi Nganyì’s?” Kàdi mmwenze ànu ùpòdya, ùlwa mpofo ànu mùdì mudimà amu.

122 Ke Dikunji dyà Kapyà dinène adi diimàne kumpàlà kwèndè adi, nè Dìyì dyumùkilaKù dyàmba nè: “Mémè ndi Yesù Ùdì ukèngesha awu. Dilongesha dyèbè dikwàtakaja kùdì bantu adi òvwa dyà mafi.” Cìvwa ncinyi aci? Kùvwa cìkèenà-kumòna cyà ku cyàbwàshì, Dìyì dyà Nzambì òvwa òvwiijibwe dilelèlè.

123 Kaa, bàna bèètù, ke cìdì cìtùkèngelà leelù ewu, mbikwàbò kàbìdì byà mùshindù awu.

124 Ndi muswè ànu kusàkidila Mukalenge. Bàna bakesè bàà bakàjì aba, mu tùkalù twà balèmà makèèlèlè dilòòlò awu, mbalwè leelù, biikàle bènda, nè kabàyi nè tùkalù twà balèmà to, ke bòbò bàyaaya bàba. Uh-huh. Mukalenge ànùbènèshè, nwènù bàna bàà bakàjì, bàdì basòmbe mwaba awu abu. Cìdì cicyènzè ncinyi? Yesù umwèumwè wàkaakula mu Dìyì dìtàmbe-mfùkìlu kale wàwa awu, ùcìdì ànu wàkula leelù ewu.

125 “Shawùlà, Shawùlà, udi uNkengesha bwà cinyi?” Shawùlà ùvwa muntu mushintùlùke.

126 Nènku bìvwa bìkèngela bwà bantu bàshintulukè leelù ewu pàdìbo mwà kumòna nè kutèèleja Dìyì dyà Nzambì udi nè mwoyi dyàkula bu mwàkenzàYe pààkèndelàYe mu Ngalèlè apu. Kaa, bushùwà’s!

127 “Shawùlà, Shawùlà, udi uNkengesha bwà cinyi?” Cyàkenza cinyi? Yèyè kuya nendè ku sèminère kampàndà nè kumulongesha tèòlòjì mupyamùpyà kampàndà anyi? Tò, Yèyè kààkenza nànkù to. CyàkenzaYe ncinyi? Wàkaakula nendè, nè kùvwa Dìyì dyena

diinà dyàkwila mu Ditutu. Cìvwa ncinyi? Nzambi umwèumwè wàkakungula pa Mukunà wà Sinàayi awu.

¹²⁸ Mu masangisha, mu myaba mùdi Nyumà Mwîmpè ùlwa cyà bushùwà, nutu nuumvwa díyì dyà muntu dishintùlùke. Wa bwalu kàyi nànsha mene mumanyè, ABC to, kàdi Kilistò ùdi mwà kwangata díyì adi nè kwakula maalu masokoka à Nzambi wa Bukolè bwónsò. Bivwa bikèngela kushintululaci mulùme yónsò nè mukàjì yónsò udi musómbe mu Bwikadi Bwèndè...?..."Mémè kutèeleja Díyì," mwàkambàye. Kaa, twètù's tudi tutàmba kubùnga tulù. Ndi ntekemena nè, kacýàkukèngela kutàmba kutòokeshiibwa kupita apu to. Kàdi tudi tutàmba kubùnga tulù mu èkèleeziyà yètù, mu tèòlòjì wetù, mu ngeelèlù wetù wa meeji, nè mu mîshindù yètù yà nsombelu, too nè mutùdi tupanga kutèeleja Díyì adi pàdiDi dyàkula.

¹²⁹ "Kaa," mùdibo bàmba, "ncifwànyine kwikala lubùkù. Ncifwànyine, nudi bamanyè's, ncifwànyine kwikala cikampàndà, cikansanga, anyi cikankènga."

¹³⁰ Ambàayibi tũng bu nè Mòsà mwà kwikala mwambe nè: "Amba tũng, ndi ndikonka aci ní cìvwa démon mu cipuka aci?" Huh! Mòsà kàakeelakù mpatà to, yèyè wàkatèeleja Díyì adi.

¹³¹ Wèwè wamba nè: "Kaa, ncifwànyine kwikala ànu kondo kàànyì kàà mwoyi kàdi kàngambila nànkù."

¹³² Pawikalà mwànà wa Nzambi, neumanyè nè n'Diyì Dyèndè. "Mikòòkò Yànyì yidi yùmvwa Díyì Dyànyì. Mikòòkò Yànyì yidi yùmvwa Díyì Dyànyì." Neyimanyè.

¹³³ Kùvwa mukwàbò, dìnà dyèndè Peetèlò, wàkasùngidiibwa, nè mùle tètè nè Nyumà. Kàdi yèyè ùcìvwa ànu muswè kushàala kacya kwàkwàta ku bilèlè byà bakùlù. Cyónsò cìvwaye mufwànyine kumanya, cìvwa mwà kwikala kaaba aka mu Díyì. Kàdi dīngà ditùkù, ku cisàsà cyà kuulu cyà nzùbu kampàndà, pàakaswàye bwà kulamina bilèlè byà nè: "Kùdi... kùdi muniyini nànsha wùmwe to, nè nsabatu, nè bikwàbò." Kùcidi ànu bantu bîmpè bààbùngi bàcidi ànu bàteeta bwà kushàala kacya bààkwàta ku bintu byà mùshindù awu.

¹³⁴ Kàdi dīngà ditùkù pàvwaye ùsanganyibwa ku cisàsà cyà kuulu cyà nzùbu awu, kutèelejayè Díyì kampàndà dyàmba nè: "Kùbìikidi cīNdi mukezùle nè: 'ncikooyike' to."

¹³⁵ Nzambi, ndi njinga bwà Àngatèku musùmbà wà bayiishi mu cibandabanda eci, bwà kubàfikisha ku dimanya nè katwèna bapàlè to, twètù katwèna bansantu babùnguluki bàà mu malaba to, musùmbà wà bùcyafù nànsha. Eci n'Nyumà wa Nzambi udi nè mwoyi. Nènku balùme nè bakàjì aba mbakwàcike nè bwîmpè Bwèndè. Kì mmupongo anyi lubùku to. N'Nyumà wa Nzambi udi nè mwoyi. Tàpulukàayi nè bilèlè byènù, bakùlù, nè tèelejàayi Díyì dyà Nzambi udi nè mwoyi. NeCikushintùlùlè. Kwàkulwa umwe wa ku bakèngeshanganyi abu to. Neùswe bwà kwikala umwe wabò. Bu wèwè mwà kusambuka mikàlù yà

malongesha èbè ònsò, too nè pawikalà mwà kwowela kubwela nè mu Bwikadi Bwèndè mwàmwa, cintu kampàndà necyènzekè. Kwàkwitabuuja nè matùkù à bishimà àkaadi mamanè kupìta nànsha. Newitabuuje nè bìdì ànu kaaba aka mene, bwalu cìmwè necikwenzèkelè, bushùwà, bwà kushintulula muntu kampàndà. Ke citu Dìyì dyà Nzambi dyènza misangu yònsò ncyòci aci. Dìtu dishintulula balùme nè bakàjì nè dibàvwija cìvwà cìkèngela bwà bôbò kwikala aci; kî ncìdì bilongelu nè balongeshi babàvwije nànsha, kàdì cìdì Nzambi mubàlongòlwèle.

Dìyì adi, dyàkula's! "Mémè kutèèleja Dìyì."

¹³⁶ Kaa, mùshindù mwine wùndì mufwànyine kujinga kubwela mu malabula à sungasunga's wè. Nè mùshindù mwine wunùdiku bafwànyine kunanga bwà kuya ku majaadiki à pàà nkàayeenù's, bààbúngì bàà kunùdì nwènu balùme nè bakàjì bàakaadi batèèlèje Dìyì Dyèndè.

¹³⁷ Nènku ndi mwà kuvùluka pàmvwà muDitèèlèje pàncìvwà ànu mwànà mutekète wa balùme, kwínshì lwà mu mikùnà yà mu Kentucky mwàmwa. Kàdì mémè kudyàmbidila nè Cìvwà nyuunyi musòmbè mu mucì, kàdì nyuunyi awu kubùukayè kuya. Yèyè nè: "Kùcìinyi to, bwalu newikalè mwà kuumuka kaaba aka dīngà ditùkù, nè newikalè mwà kusòmbela pabwìpì nè cimenga cìdì cibìikidiibwa nè New Albany." Mémè kutèèleja Dìyì Dyèndè pàakambàYe nè: "Kùnu mfwankà, anyi maalà, anyi kùnyangi mubidi wèbè nè bakàjì nè bikwàbò to. Kùdi mudimu wà wèwè kwenza pawàkolà."

¹³⁸ Kaa, Yèyè ùcìdì ànu Mukalenge Nzambi umwèumwè awu. Nènku nudi nuMuumvwa, ku dībà nè ku dībà, wàkula neenù mu kazùbù kèenù kakesè kàà cisokomenu aku, mu cibambalu cyènu cyà disambila amu. Ùpàtukila kumpàlā kwà batèèleji, pashìishe wàkula bantu bitàngìle. Dìyì dyà Nzambi, Dìvwà dyà musinga mukolè mu matùkù à Samwèlè. Dìdì dyà musinga mukolè be leelù ewu. Bwalu, kakùvwà cikèenà-kumòna cyà pa bùtookà to.

¹³⁹ Peetèlò wàkatèèleja Dìyì adi, nè Dyàkashintulula tèlòlòjì wèndè yònsò awu. Wàkaya buludì too nè kùdì bàà Bisàmbà byà bèndè, bàvwàye ùdyàmbidila nè mmusùmbà wà bantu bapangi babèngiibwe. Kàdì, Dìyì dyà Nzambi, kî ndilongesha dyèndè to, Dìyì dyà Nzambi udi nè mwoyi dyàkamushintulula.

¹⁴⁰ Nènku mpindyewu ànu mukwàbò kàbidì. Kwàkadi muntu mwìmpè, musangu kampàndà, mu Bible. Mwibidìlàngàne nè Yesù, uvwa muMunange, nè muMwitàbùùje, nè ùMukuukwila, nè banàye Nèndè, nè bayè Nèndè mu tukùnà atu, nè bapweke nè ku musulù, wènda ùlòba Nèndè. Ùvwà muntu mwìmpè. Dīngà ditùkù, pàvwà Yesù mumane kuya apu, lufù kulwalù kwìba mu cibambalu cyèndè.

¹⁴¹ Pèndè ùkaavwa mushiye èkèleeziyà wa ngiitàbijilù wa kale, yèyè nè bàna bààbò bàà bakàjì bananga, Màrtà nè Màriyà. Nènku bàvwà bapàtùke bwalu bàvwà baMunangè, nè

baMwitàbùùje nè Yéyè ke Maasiyà awu. Kàdi mu kwenza kwà nàнку awu, èkèleeziyà wàkabiipata nè lùkàsà lwònsò.

¹⁴² Ke nsongààlùmè ewu kusaamayè mu mùshindù wà nè wàkafwà nè kufwà, nè wàkajiikiibwa, matukù ànaayi kupita. Mbwîmpè kaayi bùdi malongesha à tèòlòjì bufwànyine kwenza díbà adì's? Mbwîmpè kaayi bùdi èkèleeziyà wendè mwà kwenza díbà adì's? Kàdi kùvwà Dîyi dyà Nzambi, pa buloba, nè Yéyè kwakula nè Lazàrò. Nèku Lazàrò, muntu uvwa mufwè nè mubole mu lukità amu awu, kuumvwayè Dîyi Dyèndè, nè kupàtuka nè kwikala cyàkàbìdì nè mwoyi.

¹⁴³ Mvwa mufwè musangu kampàndà, mu mpèkaatù nè matomboka. Nuvwa bafwè mu mpèkaatù nè matomboka. Kàdi cìvwà n'Dîyi dyà Nzambi dyàkamba nè: "Lwàyi kùNdi, nwènu bònsò bàdi bàkwàta mudimu mukolè nè bambùle majitu makolè, Mémè nènnpèèshè diikisha."

¹⁴⁴ Nkààdikù mumòne Dîyi dyàkula nè muntu mucibùkile panshì, dimwimanyika kuulu. Nkaadi mumòne Dîyi dyà Nzambi dyàkula nè mpofo, nè mèsù èndè kutàbalawù. Kùdi uvwa upunga nè lufù, mukunya kùdi kànsèrè, kùdi mwena nsudì, kubàmòna bààlukila nè mubidi tumatuma, nè makàndà à mubidi tumatuma cyàkàbìdì. Nkaadikù muMumòne wàkula nè bàkwàciki bàà maalà à kapyà, beena mitù minyùngùlùke, nè babèngiibwe, nè musumbà wà bàdi kabàyi pàà bwàsà, nè bàlwa bainàbànzà nè balùme bakàlàngà, nè bansantu bàà Nzambi udi nè mwoyi, bwalu Dîyi dyà Nzambi dyàkaakula. Ke citùdì tutèèleja, leelù ewu.

¹⁴⁵ Ndekèlaayi njikijè mu kwamba kwà eci nùнку: Nekùlwe cikondo, cìikalà musùùkà wèbè mulalakanyi awu mwàngàciibwe mu mubidi wèbè, kàdi kùyawù mu mwaba wàwù kampàndà wà kashidi, wùlalakana mu mîdimà, anyi mu cyàdì cyà Nzambi. Dîyi adi nedyàkule cyàkàbìdì. Kàdi Bible mmwâmbè, nè: "Bònsò bàdi mu lukità nebàteelejè Dîyi Dyèndè, nè nebàpatukè. Bàmwè nebàlwe ku bundù nè dipeetudiibwa dyà kashidi. Nè bakwàbò nebàlwe bwà ditalala dyà kashidi nè disànkà."

¹⁴⁶ Dìndà edi ndifwànyine kwikala cikondo cyùdí wangata dipàngadika dyèbè, nè anyi nèutèèleje cìdì ntèlèviziyo wamba, anyi cìdì cibèjibèji cyamba, anyi cìdì beena tèlòlòjì bamba, anyi cìdì Nzambi wamba. Lekèlaayi nnwâmbilè, nwènu bu cisambà. Kanùtèèlejìkù cìdì ní ncinyi cyamba to, ànu cìdì Nzambi wamba. Ikàlà windila kaaDîyi kakesè kapòle aku, nè Yéyè nèàkushintùlùlè.

¹⁴⁷ Wèwè udi wamba nè: "Ndi muswè kwitabuuja, Mwanèètù Branham. Mvw'a kujingakù ngìkalakù mwà kwitabuuja. Mvw'a kujingaku ngìkalakù mwà kwenza bintu kampàndà." Kàdi kanwèna mwà kwenza nàнку to. Bwà cinyi? Kanwèna nushààla

batùùkije ntàntà bule bukùmbàne to. Kanwèna nukabwela mu mwaba kampàndà mùdì m—mpatà yònsò miyè to.

¹⁴⁸ Paùdì ubwela mu mwaba wùdì mpatà mimanè kujika, dībà adi newikalè mudishikàmine, nè udi mwà kutèèleja Dìyì dyà Nzambi dyàkula. “Mwân’Àànyì, Mémè ke Musùngidi webè. Mwân’Àànyì, Mémè ke mwondopi webè. Kabyèna bikèngela bwà wèwè kwenza bintu ebi to. Ndi mufwè bwà wamòna mwà kwikala mudishikàmine. Kàdi paùcidi ànu mwínshì mu dilubakana edi, musopàkàne nè mishindù yònsò yà mēyì, dikùpebi kule nè ònsò awu.”

¹⁴⁹ Bidi bimvùlwija cikondo kampàndà cìmvwà mu mikùnà mwàmwa musangu kampàndà. Nènku ncyàdyàkupwàku malabula awu mwoyi to. Nè mwab’ewu kùkaadi bidimu bitwè ku dikumi, anyì bipìte apu, mvwa munkaci mwà kwambulwisha Mukalenge Jefferies mu dyungwija dyà nyama, nènku mpàvwàbò bènda nè mukelè muswikila paanyimà pàà tùbalù. Nènku mvwa nya naayi ku mabwe kampàndà à dilàkilapù mwaba wùmvwà mwà kuyilekelela, mwaba wùvwà ngombe mwà kulwa. Lwà paanyimà pààpa, mu kilòmèètà yipacila ku lukàmà nè dikùmi nè yibìdì nànkù awu, kule nè bantu. Anyì, ndi muswè kwamba nè, lwà mu ntàntà wa kilòmèètà mitwè ku makùmi ànaayi nè mwandamukùlù, anyì makùmi àtaanu nè yisambòmbò, pàmwàpa kilòmèètà makùmi àsambòmbò nè yinaayi, too nè ku Kremmling, mu Colorado, mùdì ukafika ku kaacimenga kakesè kàà búngì bwà bantu biipacila ku nkàmà mwandamutekète anyì mwandamukùlù. Nènku mvwa nè kàbalù kàànyì, nè mvwa mukàsùùlùle bibuta pambidi, mukùùmushe mabùkì. Nènku tudi tutàngidila ku, tukebelangana nè ngombe ayi ku tulòndò twà lùmònù. Nènku mvwa muswikile kàbalù kàànyì ku ditàmbà dyà mucì, nè matempu àvwa paanyimà pààkù, mbwena kwamba nè, kàbalù aku, kàbalù kàdi kambùle mabùkì kàdi kumpàlà kwà mulongo, ke mémè kubànda pa tukùnà atu, nè bìvwa bilenga byà dikèma, mùvwa mmu movù wà bintu bitòloka, nènku mvwa ntàngila mu bibandabanda amu, ntàngila tuubyonà tukesè twà mâyì, mu ntàntà mule, nènku pàmvwà ntàngila apu, mùvwa mmunkàcinkaci mwà mapingaja, ke mémè kumòna cintu kampàndà cyàkandengà bikolè.

¹⁵⁰ Mémè kumòna maamù mukùlàkàje ùpàtula bânà bèndè mu diswa dyèndè amu, nyuunyi wa mukànkù mukùlàkàje. Kàdi kupaapalayè eku nè eku pamutù pààbù apu too nè mwàkabàmbulàye pa mapwàpwà èndè. Nènku bàkaavwa bapàtùke mu diswa amu kumpàlà. Kàdi kuyayè naabò mu cibandabanda. Kacya kabàvwakù bânjì kudyatamù kwònsò aku to. Bàvwa ànu munkaci mwà kulonga bwà kubùuka. Pa nànkù, kubàlekelelayè. Ke kuyabo nkààyaabò, bàzòkola mashinde, bàkùlukilangana umwe nè mukwàbò, kabàyi ànu nè bìvwà bùbàtonda to nè mwàbò mwònsò. Nènku pàmvwà musòmbè kuntwaku, mémè kudyàmbidila nè: “Mpindyewu, aci kacyèna

ànu bu musùmbà wà beena Kilistò balelèla, bàdì biitabuujà anyi! Kabèèna nè bùdì búbàtonda to.” Bwà cinyi kabàvwa nè bývwa búbàtonda? Kabívwa bikèngela bwà kuciinabò cintu nànsha címwè to, bwalu maman úvwa mwálùkile buludi muulu nè musòmbe pa lubwebwe, bwà kubàtàngila. Kaa! Aci’s cidi ànu cìcìshintulula bikolè.

¹⁵¹ Panùdì nufika ku dyela meeji nè: “Ncinyi ciikalà Mpaasàtà *Kampàndà* mwà kwela meeji byôbi byenzèke nè mpetè Nyumà Mwimpè? Mwèpiskòpò *Kampàndà* neámbe cinyi?” Cidìbo bàmba nànsha ciikàle cinyi.

¹⁵² Yesù wàkafwà, nè Wàkabànda bimbàndilu byà mu Butùmbi, nè mMusòmbe mu maulu à maulu. Kakwèna cintu nànsha címwè ciikalà mwà kukutàcisha to. Dìsù dyèndè nditàngile mushàámushà, nènku ndi mumanyè nè Yèyè mmuntàngile, nè Yèyè mmukutàngile.

¹⁵³ Dìbà adi pàdìku kùlwa, kwòkò kufwànyine kulwa mubwàbwà, anyi cintu kampàndà bwà kutàcisha ùmwe wa bânà bakesè abu, mòna’s, maamù... Mbitàmbe bwimpè bwà kabàteecikù to. Yèyè’s ùdi mwà kubàkula mubwàbwà awu mu cyanza, mu nzàdì yèndè amu, kubànda naawù muulu mu butùmbùke bwà binunu byà makàsà kàdì kuwùlekelela ànu’s. Mmufwànyine kusùnsulukila mu mpeepèlè. Kakwèna cintu nànsha címwè ciikalà mwà kutàcisha bânà bakesè abu to. Yèyè neàtabaleelè bwalu abu.

¹⁵⁴ Cintu nànsha címwè kacyàkukutàcishakù to. Kùcìinyi bwà kukwàta Nzambi ku Dìyì Dyèndè to. Dilekèlèle ànu cyanààna, nè ikàlà nè diitabuujà, nè itàbùùjà. Yèyè ùdi munkaci mwà kukutàngila. Yèyè neàsùnsululè cintu kanà cyònsò cidi citeeta kukutàcisha aci. Kaa, ncifwànyine kukubunda, kàdì kacyèna mwà kukwenzela bibi to. “Bwà bintu byònsò,” Yèyè ùdi wànyisha nè byènzekè. Kí ncifwànyine kwikala cintu cikwàbò nànsha címwè to: “Bwalu bìdì bikwàta mudimu pàmwè bwà dyàkalenga dyà aba bàdì banangè Mukalenge.” Kakwèna cidi mwà kukwenzela bibi to.

¹⁵⁵ Nànku awu, paanyimà pàà katanci, kulwakù cipeepèlè cikolè. Kàdì pààkatwàdijà cipèèpèlè cikolè aci, cyàkalwa nè lukàsà, byèbè byà ku nord abi’s, nkwelèke ànu kamupenyi kakesè ke cipeepèlè aci pààci cyènda cilwa, nè lùbilu lwà kilòmèetà makùmi citèemà nè yisambòmbò anyi lukàmà nè dikùmi nè yibidi ku dìbà dimwèpèlè. Ke maamù mukankù mukulàkàji awu kushiya lubilà lukolè lunène, kàdì ke yèyè uyààya mupwèkè mu cibandabanda amu awu. Nè lubilà lukolè alu, lwàkenza cinyi? Tuumikankù tukesè atu tùvwa tumanyè dìyì dyà mamwàtù.

“Mikòòkò Yànyì mmimanyè Dìyì Dyànyì,” mwàkambàYe.

¹⁵⁶ Njìwù yìkaavwa pabwìpì. Mpindyewu, katwàkateeta bwà kubwela mwínshi mwà bitupà binène byà mici to. Katwàkateeta

bwà kunyeema kukabwela mu mushiki wà bukooya wà mùshindù kampàndà to. Tùvwa ànu twindile maman.

157 Ke civwà cikèngela bwà mwena Kilistò kwenzayè ncyôci aci; kumòna ciikalà Nzambi mwà kwenza pa bwalu abu.

158 Kàdi maamù mukùlàkàjì awu—awu mmwenzè ànu ùlenga buloba, makàsà manènè menemene à bunène *nunku* awu, kutùulukayè panshì ànu bu ndèkè munène wa katankù wíkila panshì. Ke kukùpayè mutù wèndè mu lupeepèlè nè kwelayè lubilà lukolè, nè kubaalulayè mapwâpwâ manène awu, ipacila metèlè ànaayi nè citùpâ, kwambwila ku lusongo nè ku lukwàbò, maalabàle bu mùdì kwangacila ku dikunji *edi* nè ku dikunji *dyàdya*. Tuumikankù tukesè twònsò atu kuvùkutatù lubilu nè mwàtù mwònsò, nè kutùpikilatù ànu pa mapwâpwâ à mamwàtù apu. Kwololatù ànu tukàsà twàtù tukesè atu nè kwela nzàdi, kwangatatù tuumiinù twàtù tukesè atu, kàdi kupyàtu mu òimwè dyà ku masàlâ àdì mashilè ndendende awu. Maman kubàmbula ànu cyanàànà, kàyì nànsha ùzakeeja mapwâpwâ awu to, kàdi kubànda mu lupeepèlè amu. Ke yèyè uyààya buludi mu mbwebwe wàwa, bwà kubàsokoka kule nè cipeepèlè cikolè civwà munkaci mwà kulwa aci.

159 Kaa, mwanèètù, cipeepèlè cikolè cikaadi pabwìpì. Tèelejà Dìyì Dyèndè. Dìdì dikubìikila nè: “Pàtukà mu Baabùlòònà. Ikàla mutàpùlùke. Kanùlù kwikala baabanyanganyì bàà yèndè, bàà mpèkaatù yàbò to. Mémè nènnpwàkidilè. Nenwikalè bàna bàà balùme nè bàà bakàjì Kùndì. Mémè nèngiùkalè Nzambi kunùdì.”

Twìnyikààyi mitù yètù bwà katanci kakesè cyanàànà, patùdì tujikija apa. [Mwanèètù wa balùme kampàndà ùdì ùfla dīyì dyà cipròfetà—Muf.]

160 Amen. Nuumvù aci's. Aci ke citùdì tubìikila nè ncipròfetà mu èkèleeziyà.

161 Kùdikù mwà kwikala bàmwè kaaba aka mu dindà emu, ndi mumanyè nè bàdikù, bàdì bafwànyine kwamba nè: “Mukalenge Nzambi, ikàlàku naanyì luse. Nànsha mùndì mukashààle wa mu èkèleeziyà, mwenzè ditonda, kàdi ncyèna—ncyèna mumanyè nè kushààla mutùùkije kumpàla Kwèbè ncinyì to, nè kutèeleja Dìyì Dyèbè dindombola nè dindongesha. Ncyèna mufwànyine kumanya cyà dyanza to bu Wèwè mwà kwakula naanyì mu Dìyì dijìkùke. Ndi mwà kunanga bwà kuKumanya, bwà Wamòna mwà kwakula naanyì nè kuludika tujila twànyì anyì”? Nudikù mwà kwela byanza byènu muulu mpindyewu mene kwamba nè: “Nzambi, ikàlàku nè luse anyì”? Mukalenge ànùbènèshè, myaba yònsò, kùdì byanza myaba yònsò. Tùngunukààyi ànu nè kubyèla muulu. Ncyà bushùwà. “Mukalenge, ikàlàku naanyì luse. Ndi Neebè dijinga dyàbùngì.” Nkufwànyìnekù kwikala bakwàbò kàbidì kumpàlâ kwà kujikija anyì? Nzambi mmumòne byanza byèbè lwà paanyimà pààpa, inàbànzà, nè nwènu bònsò lwà paanyimà pààpa, nè bàdì biimàne mu milongo nè bikwàbò.

mu ndondo mu mùshindù wà bilenga nsòmbelu mulenga wa buumùntù bwèbè. Aci's ke cidi cikushintulula ku wa mpèkaatù. . .

168 Ngènzàmpèkàatù ncinyi? Mwena bupidyà. Kùdi bantu bààbùngì leelù ewu, biikàle nè—nè dipòlomè dyà Licencié, biikàle nè dipòlomè dyà bu docteur, biikàle nè Ph. D., nè misangu yibidi L. D. ku dîna dyàbò, kàdi biikàle ànu bangènzàmpèkàatù. Bamanyè Bible kwambwila ku Genèsè too nè ku Bwàkabuulwibwà, bàyiisha mu cyambilu, kàdi bacikàle biitabuu- . . . kabàyi biitabuuja. Bible mmwâmbè nè: “Ewu udi kàyi wìtabuuja to mmumanè kupiishibwa.”

169 Konkàayi umwe wa ku bantu abu ní bàdi biitabuuja nè Nyumà Mwîmpè ngwa leelù ewu. “Mòna's, nànsha kakesè.” Udi wìtabuuja nè dyondopa dyà kùdi Nzambi didikù anyi? “Mòna's, nànsha kakesè.” Dìbà adi yèyè mmwena bupidyà. Ncyà bushùwà. Piikalàbi nè Nyumà Mwîmpè ùdi munda mwèbè, Yèyè kàakufìlakù bujaadiki ku Dìyi Dyèndè Yèyè mwìnè anyi? Kàdi nyumà udi munda mwèbè awu yèyè ùfla bujaadiki bibèngangana nè cidi Nzambi wàmba nè ncilelèlè, kî n'Nyumà wa Kilistò to. Udi mufwànyine kwikala wa mu èkèleeziyà wa Kilistò, kàdi kwèna wa Kilistò to pàdi nyumà webè kàyi útwa “amen” ku mulayi wònsò wùdi Nzambi mufile. Nè pààkalayàYe. . .

170 Peetèlò wàkamba, mu Ditùkù dyà Mpenta, yèyè nè: “Nyingàlalaayi, muntu nè muntu wa kunùdi, nùbatiijiibwè mu Dîna dyà Yesù Kilistò bwà dilekelediibwa dyà mpèkaatù yènú, nènku nenùpetè kupà kwà Nyumà Mwîmpè.” Kàdi piikalà nyumà webè wàmba nè aci cìvwa bwà ditùkù dikwàbò. . . Ncinyi cìwà Mufundu mwâmbè? “Bwalu mulayi wùdi kunùdi nwènú,” beena Yudà, “nè kùdi bânà bèènú balela, nè kùdi aba bàdi kule,” bàà Bisàmbà byà bendè, “mu bùngì bwònsò bwàbiikilàbo kùdi Mukalenge Nzambi wetù abu.” Mulayi wùmwèwùmwè awu.

171 Yèyè wàkamba nè: “Mémè ndi Mwonji wà mvinyò, nwènú nudi matàmbà.” Nènku piikalàbi nè n'Dilongesha dyà ditàmbà, ditàmbà dyà kumpàlà, ditàmbà diibìdi didi nè cyà kwikala nè Dilongesha dimwèdimwè adi. Nè Dilongesha dimwèdimwè adi nedìtwalè bipeta bimwèbimwè abi. Nènku pàdi ditàmbà dyònsò dilwa pa mwonji wà Mvinyò, nedikwame cintu cìmwècìmwè aci. Ndi nè disànkà, mu dindà emu, ndi nè disànkà dyàbùngì dyà kumanya nè Nyumà wa Nzambi udi nè mwoyi ùcidi ànu uyiikila nè wàkula nè bantu, nè ùshindika Dìyi Dyèndè.

172 Netùditwè mu mudimu wà dibàtiiza ànu mu katancì kakesè cyanààna emu. Pawikalà mummyaminyiibwe màyi, mupòngolwela màyi, anyi mwinyija mu màyi mu mùshindù kanà wònsò kamùyi mu Dîna dyà Mukalenge Yesù Kilistò to, udi mwediibwe kadyòmbò bwà kulwa ku màyi.

173 Mpindyewu wêwè udi wamba nè: “Mwanèètù Branham, nguswa kungambila mêmè anyi?” Èyowà’s, mwanèètù.

174 Dimyaminangana dyà mâyi kî ndyakùdiibwe mu Bible to. Kakwèna mwaba nànsha wùmwè mu Bible wùkaadiku muntu nànsha umwe mummyaminyiibwe mâyi to. Mpindyewu vùlukàayi eci, ndi mukonkè mu cyambilu emu, mu lumingu lujimà: Mpetèlaayikù mwaba wùkaadiku muntu nànsha umwe mu Bible emu mummyaminyiibwe mâyi bwà dilekelediibwa dyà mpèkaatù yèndè, nànsha mupòngolwela mâyi bwà dilekelediibwa dyà mpèkaatù yèndè, anyi nànsha mubàtijiibwe mu diinyijiibwa mu mâyi mu dîna dyà “Taatu, Mwàna, Nyumà Mwimpè” bwà dilekelediibwa dyà mpèkaatù yèndè. Kacya kakùtukù kwânji kwikala muntu mummyaminyiibwe mâyi, mupòngolwela mâyi anyi mubàtijiibwe mu dîna dyà “Taatu, Mwàna, Nyumà Mwimpè,” mu Bible mujimà kwambwila ku cizubu cyà mbangilu nè cyà ndekeelu. To, mukalenge. Bàvwa . . .

175 Kùvwa bàmwè bantu babàtijiibwe musangu kampàndà kùdi Yone Mubàtiji, nè bôbò kabàvwa babàtijiibwe mu dîna nànsha dimwè to, kadi’s bàvwa babàtijiibwe kùdi muntu umwèumwè wàkabàtiiza Yesù awu. Kadi Pòlò, pàakatwilanganàye naabò mu Byenzedi 19, kubàmbilayè nè bàvwa nè cyà kulwa kubàtijiibwa cyàkàbidi mu Dîna dyà Yesù Kilistò, bwà cyanàànà kabàvwa mwà kupeta Nyumà Mwimpè to.

176 Pàakasanganà Peetèlò bàmwè bàvwa bapetè Nyumà Mwimpè kumpàlā kwà kubàtijiibwabò mene, wàkabàtùmina dîyi nè wàkashàala naabò too nè pàakabàtijiibwabò mu Dîna dyà Yesù Kilistò. Aci’s ncilelèlā, mulundā wanyī.

177 Ndi mumanyè nè bantu bàabûngi batu bamba nè: “Mpindyewu, Mwanèètù Branham ùdi ànu mwena nè Ànu Yesù Nkàayèndè.” Aci ncyà mafi.

178 Mêmè ndi ngùtabuuja ànu Mifundu. Ncyèna wa mu nànsha dimwè dyà ku mângumba awu to. Nènku beena nè Ànu Yesù Nkàayèndè kabātu bābātiiza mūshindū awu to, nànsha nānku. Badi ànu bābātiiza cyanāànā, mu Dîna dyà “Yesù.” Bible mmwambè nè: “Mukalenge Yesù Kilistò.” Kùdi ba-Yesù bàabûngi, kadi Mukalenge Yesù Kilistò ànu umwèpelè. Nwamònu anyi? Nwamònu anyi? Kilistò ke Maasiyā awu. Nwamònu anyi? Nènku aci’s ncyà bushùwā.

179 Nènku mpindyewu, nwènù balundā bàànyī, mpindyewu, nwènù badi kaaba aka mu dindā emu abu, batu kacya kanūyiku bānji kubàtijiibwa mūshindū awu to, Dīyi dikesè dipolòbèle dyà Nzambi dyàkwilèku mu ndòndò wa musùukā wèbè. Nè kùyi utàngila cidi mwèpiskòpò, cidi èkèleeziyā, cidi ní ncinyi ní ncinyi kanā cyònsò cyāmba to, lwākù ùtùmikile Mukalenge, ke dyànyī dīyi dindī nkutùmina.

180 Nènku, mpindyewu, Mwanèètù Neville neāye ku cibambalu eci, bwà kudilongolola bwà mudimu wā dibātiiza. Nè aba badi—

bàdì munkaci mwà kulongolola bintu abu, bàmwè bàà ku bakùlù nebàye naanyi. Nèngiikalè neenù muntwamu, mu katanci kakesè cyanààna emu.

¹⁸¹ Kàdì ndi muswè bwà aba bìikalà mwà kulwa mpindyewu abu, patwìkalà mwà kwimba nè: “Ndi mwà kuumvwa Musùngidi wanyì ùbìikila.” “Nènye Nendè. Nànsha èkèleeziyà kaayi, nèMmulonde. Nànsha ní nganyi ní nganyi, mèmè nèMmulonde njila mujimà.” Bantu ba—balùme bàye ku cibambalu *eci*, nè bakàji bàye ku cibambalu *eci*, patùdì twimba mpindyewu apa. Pashìishe nebàtùtangàlàjè, mùtùbì ànu kwònsò eku amu, ànu mu katanci kakesè cyanààna mpindyewu. Èyo. Bònsò cyàpàmwè mpindyewu.

Ndi mwà kuumvwa Musùngidi wanyì ùbìikila,

¹⁸² Mpindyewu, bantu balùme bàye *eku*, bakàji lwà *eku*.

. . . Musùngidi Wanyì. . .

Bàmwè bàà ku bakàji bàbwelè *mwab'ewu* nè bakàji aba, bu nwènù mwà kuswà.

Ndi mwà kuumvwa Musùngidi wanyì. . .

Cyùvwà mutèèlèje ncinyì? Dìyì Dyèndè.

“Angata nkùrusè Wanyì, ùlondè, ùndòndè Mèmè.”

Mwaba wùdìYe. . . (Mpindyewu udi ucyàmbilamù anyì?). . . Nèndondè, KwandombolàYe aku ke kungààlondà, KwandombolàYe aku ke kungààlondà, NèMmulonde, nèMmulonde njila mujimà.

¹⁸³ Mpindyewu, pàndì ngàmba nùnkù apa, mulundà wanyì, mèmè kuumvwa Dìyì. Kàdì pìikalàbì nè Dìyì adi kì ndyakùle bilondèshile Dìyì dyà Nzambì to, *Edi*, ndìyì dyà mashimi. Kàdì: “Mikòòkò Yànyì mmimanyè Dìyì Dyànyì.”

¹⁸⁴ Mmuniyì mùdì mwà kulwa? S'ke kabingìlà kaùdì ulwila aka. Mbwalu: “Dìná dyèbè dyàkafùndiibwa mu Mukàndà wà Mwoyi wà Mwàna wa mukòòkò kumpàlà kwà difùkà dyà dyulu nè buloba.” Ke cìdì Bible mwàmbè. Anjì elààyiibì meeji bwà muntu udi musòmbe nè mumanyè nè aci m'Bulelèlà bwà Èvànjeeliyò, kàdì nànsha nànkù cintu kampàndà kacya ànu cyàmukwàta, mumanyè nè pàmwàpa dyèndè dìnà kadivwa difundamù to. Dìbà adi ncinyì?

“Bàdì baNkuukwila mu cijèngù.” Nwamònu's: “Mu cijèngù.”

¹⁸⁵ “Kaa,” mùdì wamba, “mèmè's ndi muntu wa lulamatu. Ndi muntu wa lulamatu. . .” Aci kacýèna naaci bwalu to.

¹⁸⁶ “Bàdì baNkuukwila mu cijèngù, bàlongesha mèyì matùma à bantu bu dilongesha.”

¹⁸⁷ Ndi munwambìle nè, kakwènakù muntu nànsha umwe mummyaminyiibwe màyi, mupòngolwela màyi, anyì mubàtijiibwe,

mu dinà dyà “Taatu, Mwàna, Nyumà Mwímpè” mu Bible emu to. Cikenketaayi. Nùcipetè. Pùkalàciku, lwâyì nùndeejè, pa cibumbà cyà ku cyambu apa dilòlò edi. Dìbà adi, pawikala bakwenzèlè mùshindù awu, udi ulonda bilèlè byà bantu.

¹⁸⁸ Nènkù muntu yèyè mukwambile nè: “Èè, lwàkwaku kùnu wènzè ditonda dyèbè, udi upeta Nyumà Mwímpè dìbà adi.” Aci ncyà mafi. Aci’s ndilongesha dikwatakaja kùdì bantu.

¹⁸⁹ Kùdì dibàtiiza dyà mu màyi dyà mashimi. Kùdì dibàtiiza dyà mashimi dyà Nyumà Mwímpè. Dyabùlù ùdì ùCìtentula bwalu yèyè mmutèndeledì. Kaayinà, tatwèndè ùvwa mutèndeledì, ànu mutùdì bacimòne. Dimiinu dyà nyòka dicidì ànu ditùngunuka. Nè Dimiinu dyà mukàjì, kupicila ku Kilistò, dicidì ànu ditùngunuka.

“Kàdi, muntu nànsha umwe kèna mwà kulwa pàdì Taatu Wanyì kàyì mumukòke to.”

¹⁹⁰ Mpindyewu elàayi meeji bwà bàmwè bàdì basòmbe kaaba aka, mu dindà emu, bàdì bamanyè nè nudi babàtiijibwe mu mùshindù wà mafi abu, mu twitabàayi wa muntu, kàdi kabiyyi bilondeshile Bible to, nènkù dilediibwa dyèbè dyà kumpalà dyà ditonda adi ndyà mashimi. Mmuniyì mùdì mwà kwikala mubinge, paùdì kùyì mwalùkile nè mutwàdije bìmpè? Nudi bavùluke nè, lumingu elu, ndi muiishe nè: *Kabyàkadi Nànkù Ku Cibangidilu To*.

¹⁹¹ Mpindyewu, kàdi bu wèwè mwà kuumvwa Dìyì dyàkula neebè, n’Nzambì, bwalu Dìdì dipetangana nè Mifundu. Kabiyyi nànkù to, dìbà adi kùdì dīyì dibi dyà mùshindù kampàndà dyàkulangana neebè. Kàdi Dìyì dilelèlè nedikwambilè bwà kulonda tunungu twà Bible; kī mbyà dimyaminangana dyà màyi to, kī mbyà dipongolwelangana dyà màyi to, kī mbyà mafi abi to. Pàtuka ànu buludì nè ùlondè tunungu twà Bible.

¹⁹² Enzàayi nànkù, balùndà bàanyi, nànsha binùkèngela bintu byònsò. Nànsha byòbì mwà kundomba cinyi, nènteeke ku luseke bintu byònsò, bwà kulonda Mukalenge Yesù.

¹⁹³ “Tèelejà Dìyì Dyànyì. Mikòòkò Yànyì neyitelejè, nè neyilwe kùNdì. Nè bònsò bàalwà kùNdì abu, Mèmè nembàpèeshè Mwoyi wà kashidi, nè nembàbiishè ku lufu ku matùkù à ndekeelu.” Ncyà bushùwà anyi?

¹⁹⁴ S’ki cyôci eci, cikumbànàngàne ànu menemene nè Mifundu. Muntu nànsha umwe kèna mwà kujaadika nè nCibì to. Ncyà bushùwà. Muntu nànsha umwe kèna mwà kujaadika nè nCibì to. S’ki cyôci eci, mu Bukolè bwà Nyumà, munkaci mwà kwenza bintu bimwèbimwè byàkenzà Yesù abi. S’ki Yèyè ewu, mu cimfwànyì, Dikunji dyà Kapyà dimwèdimwè adi, dikwàta mudimu, mamuma àmwèàmwe awu, Nyumà umweumwe awu, ùtwàla disaluka dimwèdimwè adi, cyenzedi cimwècimwè aci, bimanyinu bimwèbimwè abi, maalu à kukèma àmwèàmwe awu.

Ki bwalu mbwôbù abu's. Tèèlejàayi Dìyì dyà Nzambi mu dindà emu.

Kàdi's Dìyì dyàkamba nè: "Samwèlè."

¹⁹⁵ Yèyè nè: "Èyowà's, Mukalenge. Èyowà's, Mukalenge. S'ki mêmè ewu. Musadidi Webè nyèyè ewu. Musadidi Webè nyèyè ewu. Nèndondè."

Nzambi àbèneshe inàbànza awu. "Nèngiikalè. . ."

¹⁹⁶ Wèwè udi wamba nè: "Mwanèètù Branham, wèwè's udi uvwija aci cikalè cyà cyènta nè bwôwà." Ndi muswe bwà nè ciikalè cikalè menemene. Cidi pankaci pàa Mwoyi nè lufù, pa nànkù ndi nè cyà kucivwija cikalè menemene. Mukalenge ikalè neenù, ke disambila dyànyì dyà meeji matòòke ndyòdi adi.

¹⁹⁷ Mpindyewu, kumpàlà kwà kutentemunabò nkwasà yà nzùbu ewu, bwà kupeta. . .bwà nwamòna dibatiiza. Mwaba ewu mmukàngula díbà dyònsò. Ndi muswè kubalakù ndambù, kuumukila ànu buludi mu Mifundu, bwà nwamòna nè ndi—ndi mbala.

¹⁹⁸ Yesù Kilistò, mu nshapità wa 16 wa Maatàayi Munsantu, ngèèla meeji, wàkambila Peetèlò nè: "Ndi nkupèesha nsapì yà Bukalenge bwà mu Dyulu. Cyònsò cyùdi wèwè uswika pa buloba aci, Mêmè nènciswikè mu Dyulu; cyònsò cyùdi wèwè usùulula pa buloba aci, Mêmè nèncisùululè mu Dyulu." Nwènu bònsò nudi bamanyè nànkù anyì?

¹⁹⁹ Mu Ditùkù dyà Mpenta, pàvwà Bukalenge bwà Nzambi bulwè mu kaabujimà kàa Bukolè Bwàbù, nudi nwitabuuja nànkù anyì? Peetèlò, mwimàne. Mpindyewu, pàakabìikà Yesù ku bafwè, Yèyè kàvwà nè nsapì yà Bukalenge to. Ncyà bushùwà anyì? ["Amen."] Yèyè ùvwà nè nsapì yà lufù nè yà ifernò, kí nnsapì yà Bukalenge to. Kàdi eci's ke cyàkambàye pàakadiye ùyiisha, nè bàvwà munkaci mwà kutèèleja maalù aa, kàdi bààkapapisha mwoyi wàbò. Ke cyàkambà Peetèlò ncyòci eci menemene.

²⁰⁰ Mpindyewu tèèlejàayi nè ntèmà pàndi mbala Mifundu apa, bwà nwamòna mwà kuumvwà. Byenzedi, nshapità mwi2. Vùlukàayi. Mbanganyì bàvwà kaaba aka bwà kutèèleja diyiisha dyà nè: *Kabyàkadi Nànkù Ku Cibangidilu To?* Twàlukilàayi ku cibangidilu bwà tùmone cidi dibatiiza, kubàtiizangana kwikàle bulelèlè. Mmùshindù kaayi wùvwàbi bikèngela bwà twètù kubàtiijiibwa? Bàmyamina màyi, bapòngolwela màyi, anyì mu dînà dyà "Taatu, Mwàna, Nyumà Mwimpè"?

²⁰¹ Vùlukàayi nè, ndi mwelè mwambi kanà yònsò kadyòmbò, mwèpiskòpò kanà yònsò ewu, muntu kanà yònsò ewu, mwaba kanà wònsò, díbà kanà dyònsò, bwà kundeejakù Mufundu wùmwèpelè mwaba wùkaadiku muntu nànsha umwe mummyaminiibwe màyi, mupòngolwela màyi, anyì

mubàtìjìibwe mu dîná dyà “Taatù, Mwânà, Nyumà Mwîmpè.” Cìdì bwàshì. Kacyèna mu Mifundu to. To.

202 Ntwitabààyi wa mashimi, mukwàtakaja, mubanga kùdì èkèleeziyà wa Kàtòlikè. Dimyaminangana dyà màyi adi dyàkenjiibwa kùdì èkèleeziyà wa Kàtòlikè, bidimu bitwè ku nkàmà yisambòmbò paanyimà pàà lufù lwà muiyidi wa ndekeelu. “Taatù, Mwânà, Nyumà Mwîmpè” wàkangaciibwa ànu cikondo cimwècimwè aci, bwalu beena Kàtòlikè bàtu bàkuukwila nzambi mishìilèshìilàngàne, nè bààkenza búsàtù bwà midimu yà Nzambi. Kí n’Nzambi yisàtù to; Taatù, Mwânà, Nyumà Mwîmpè. Aci’s mbumpàngaanù.

203 Kùdì Nzambi umwèpelè. “Kwìkadi nè nzambi mikwàbò kumpàlà Kwànyi nànsa.” “Tèelejààyi, Éyi Izàlèlèlè, Mémè ndi Mukalenge Nzambi webè, Nzambi umwèpelè.”

204 Mwena Yudà wàkatùkonka nè: “Nzambi wenù nganyì; Taatù, Mwânà, anyì Nyumà Mwîmpè anyì?”

205 Bàdì ànu Umwe. Mmidimu yisàtù yìdì Nzambi umweumwe awu mukwàcilemù mudimu, munkaci mwà kuDimwènesha.

206 Dyàmbedi, mu Taatù, kàvwa mwà kulengiibwa to. Mulembèlèle pa mukùnà; nànsa ngombe anyì nyama mmufwànyine kulenga ku mukùnà awu, mmufwànyine kushipiibwa.

207 Pashìishe kutùùlukaYè, bwalu Ùvwa muswè bwà kumukuukwilabò. Wàkaseemena pabwìpì nè muntu, bwalu Wàkalwa Mwânà wa muntu. Nzambi ùvwa munda Mwèndè.

208 Nè pààkenzàYe cyòcì aci, pashìishe kwambaYè nè: “Katanci kakesè aka bàà pa buloba kabààkuMmòna kàbidì to. Kàdì, nwènù nenùMmònè, bwalu Mémè,” mupinganyi muleeji muntu, “Mémè nêngìikalè neenù, munda mwènù mene, too nè ku ndekeelu kwà buloba.” Yèyè nè: “Ndi mufùme ku Nzambi.” Cinyì? Dikunji dyà Kapyà. “Ndi ngààlukila ku Nzambi.” Wàkalukila anyì? Wàkalukila. Nè pashìishe pààkenzàYe aci, Yèyè kwalukila kùdì Nzambi.

209 Dìbà adi tudi tusangana Pòlò, mu dileesònà dyètù dyà mu dindà emu edi, mu njila mutàngile ku Damàsèkè. Nènku kusanganayè Pòlò pàvwàye mu njila apu. Nènku Wàkamubyànkula panshì. Kàdì pààkatàngilà Pòlò, Yèyè ùvwa cinyì? Dikunji dyà Kapyà cyàkàbidì, Bukènkè kampàndà bwàkamufomijà mèsù abu.

210 Tàngilààyi cyàkenzà Yesù pàvwàYe pa buloba, nè wàkambila mukàjì awu mpèkaatù yèndè, wàkenza bintu byònsò ebi. Ke Yèyè nè: “Ncyèna ngèenza cintu nànsa cimwè pàdì Taatù kàyi muNdeeje dyàmbedi to.”

211 KuMukonkabo, bàmba nè: “Bwà cinyì Kwèna upweka kuntwaku bwà kwondopa bantu bààba?” Kupìcilabo munkaci mwà musumbà munène, mùvwà balèmà, bilèmenda, mpofo, nè

beena bidimba byuminyine. Wàkondopa muntu kampàndà nè disaamà dyà mpàcì wa mēnyì, anyì cintu kampàndà, mulààle pa kalààlu. Yèyè nè: “Bwà cinyì Kùyiku wenzela musùmbà wàbù mujimà awu’s?”

²¹² Yèyè kwamba nè: “Bulelèlà, bulelèlà...” Yone Munsantu 5.19, mpindyewu, “Bulelèlà, bulelèlà, Ndi nnwàmbila nè, Mwànà kēna mwà kwenza cintu nànsha cìmwè mu Yèyè mwinè to; kàdi ànu cidiYe ùmòna Taatù wēnza aci, ke cidi Mwànà wēnza.”

²¹³ S’ki Yèyè ewu mulwè cyàkàbidì, mu matùkù à ndekeelu aa. Beena maalu à mamanya kabèèna mwà kucidyula to. Èkèleeziyà kēna mwà kucidyula to. Ke cyôcì aci, mmwalùkila buludi mu èkèleeziyà nè wēnza cintu cìmwècìmwè aci. Nyumà’s! Nzambì mmuswè aba bìikalà mwà kukuukwila mu Nyumà nè mu Bulelèlà. S’ki Yèyè ewu.

²¹⁴ CyàkambàYe mu Ditùkù dyà Mpenta ncyôcì eci, Peetèlò munkaci mwà kuyiisha:

*Yesù ewu udi Nzambì mubiishe ku lufù, mùtùdì...
twètù bônso tudi bantèmù. (Tudi bantèmù anyi?)*

Ki bwà cinyì mwikàle ku dyàbalùmè dyà Nzambì mubàndishùbwe,...mupetè kùdì Taatù mulayi wà Nyumà Mwimpè, yèyè ngudi mwicikije eci, cinùdì nwènù numòna nè nuumvwa mpindyewu eci.

Bwalu Davidi kàakabànda mu...dyulu to, kàdi wàkamba yèyè mwine nè: MUKALENGÈ wàkambila Mukalenge wanyì nè: Sòmba wèwè ku dyàbalùmè dyànyì,

Too nè pangààvwijà beena lukunà bèèbè citèèkedi cyèbè cyà makàsà.

Ki bwà cinyì nzùbu mujimà wa Izalèlèlà àmanyè nè ditwìshùbwa dyónso nè: nè Nzambì mmwēnzè Yesù umwèumwè ewu, unùdì bapoopèle pa nkùrusè ewu, byónso bibidì Mukalenge nè Kilistò.

Mpindyewu pàakumvwàbo cyôcì eci, (bàvwa mbatèndeledi abu) pàakumvwàbo cyôcì eci, bàakalengùbwa bikolè mu myoyi yàbò, nènku bàakambila Peetèlò nè...bàpostolò bakwàbò abu nè: Bakwètù wa yààya, netwēnzè cinyi?

²¹⁵ Netùye ànu cyanààna nè netwikalè bimpè anyi? To, to. Nwadi mukaayi, Peetèlò, wèwè ngudi nè nsapì yà Bukalenge mpindyewu. “Cyùdì ubàmbila,” mwàkambà Nzambì, “Mémè nènciswikè mu Dyulu pawàciswikà pa buloba.”

Peetèlò kubàmbila nè: Nyingàlalaayi, yònsò wa kunùdì, nùbatiijiibwè mu dìnà dyà Yesù Kilistò bwà dilekelediibwa dyà mpèkaatù, nènku nenùpetè kupà kwà Nyumà Mwimpè.

Bwalu mulayi wùdi kunùdì, nè kùdì bânà bèènú balela, nè kùdì aba bàdì kule menemene, mu búngi bwónsò mene bwàbùkilàbo kùdì Mukalenge Nzambi wetù abu.

- 216 Mukwàbò Mufùndù. Bidimu makùmi àsàtù nè bìbìdì paanyimà pàà cyôci aci, Pòlò, lwà mu nshapità wa 19 emu:

Pòlò mumanè kupìcila mu nseke mitùmbùkè yà... Efèsò: ùdì ùsangana bayiidi kampàndà,

Ke yéyè kubàmbila nè: Nwàkapeta Nyumà Mwìmpè kacya nwítabuujà anyi?

- 217 Ba-Baptistes, lekèlaayi aci cipwekeku munda mwènù. “Nwàkapeta Nyumà Mwìmpè kacya nwítabuujà anyi?” Ndilediibwa, kî nditonda to.

...Katwèna bamanyè mpenyi pàdiku Nyumà Mwìmpè nànsha umwe to.

Ki yéyè kwamba... Nku cinyi... kunwàkabàtìiijibwa dîbà adi? Bààkabàtìiijibwa, Kùdì Yone...

Pòlò wàkabàmbila nè: *Bulelèlè Yone wàkabàtìiiza... bwà kanyinganyinga, (kî mbwà dilekelediibwa dyà mpèkaatù to), bwà kanyinganyinga, wamba... nè bìwwa bikèngela bwà nwènù kwitabuujà ewu udi nè cyà kuluwa... mbwena kwamba nè, mu Yesù Kilistò.*

Nènku pààkumvwàbo cyôci eci, bààkabàtìiijibwa mu dînà dyà Mukalenge Yesù Kilistò.

...ke Pòlò kubàtentekelayè byanza, nè Nyumà Mwìmpè kulwa Yè pambidi pààbò; nè bààkaakula mu myakulu, nè kutùmbishabò Nzambi.

- 218 Mpindyewu lekèlaayi nnwangàcìlè, Pòlò, mu kujikija mukàndà wèndè mufùndilangana awu, Galàtiyà 1.8:

...nànsha twètù, anyi mwanjèlò wa mu dyulu, munùyiishe èvànjeeliyò mukwàbò kàyi ewu unùkaadi bamanè kuumvwa, ikale kunùdì mwedùibwe mulawu.

- 219 Ndi kàbìdì mufwànyine kuya neenù mu Kolintò, nshapità wa 14, mvensà wa 38, mùdìYe mwâmbè nè:

Muntu yéyè ùjikula nè ngwa nyumà, anyi mupròfetà, ajingululè nè... cìndì nnùfùndila eci mmèyi matùma à Mukalenge.

Kàdì yéyè mwikàle mupangi, ikale ànu mupangi.

- 220 Citwènzà bwà bwalu abu ncinyi? Cileeeji cyònsò... Bu mèmè mwikàle pa kaaba kèèbè, nè mwikàle nciyi mubàtìiijibwe bilondèshìle dibàtìiiza dyà bwena Kilistò to, cìvwà èkèleeziyà wanyì wèla meeji nànsha ciikàle cinyi, anyi cìvwà mààmù wanyì wèla meeji, ndi muswè kumanya cìdì Mukalenge wanyì ùtùma díyi bwà kwenza.

²²¹ Mukalenge Yesù, m'Bèèbè Wèwè mpindyewu. Nènku ndi ndòmba bwà Òkwatèku mudimu pa mwoyi wònsò. Nènku pèèshakù aba, bàdì mu ciinà cyà mâyì bwà kubàtijiibwabò abu, Nyumà Mwîmpè, pàdìbo baKwindile apa. Mu Dînà dyà Yesù tudi tuKulàmbula musùmbà wa bantu ewu, bwà mu Ditùkù adi, Mukalenge, ncìikadikù mupìile to, kàdi musùulùdìibwe ku mashi à bantu bònsò; ncìyi mmwimànyìne ku cilèlè kampàndà, anyì dìngumba kampàndà, anyì bulongolodi kampàndà to, kàdi mmwimànyìne pa Dìyì Dyèbè. Amen. 

58-1005_M Tèèlejà Dîyi Dyèndè
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org